

# **MARKUS**

## *Kawuri kəji Isa Almasiwuye Markus ruwujənada*

### **Linjila Markussedə**

*Kitawu Markus ruwujənada, tima Linjila kənyindiyedə wo. Ti Markusdə kəngayamba mewun yindin Isaye falnja gəni yaye, Biturus-a kəngayamba gadedə-aa jauro nojəna. Tayiyen ti ye lawar Isayedəa fangeno. Tussənni ngawon Ruhu Alaye tia cakke taldu bawoaro awo ania kəla kəndəgai Isayen ruwuyeno. Lamar ani wakkajanadə ku saa dəwu yindi gai yaye, Ala cakke Linjila adə gadejənnin har nandero kadio.*

---

### **DABBARDA KIDA ISAYE**

#### **Nawi Yahayaye Isaro jawal dabbarduwu**

*(Mat 3.1-12; Luk 3.1-20; Yah 1.19-28)*

**1** <sup>1</sup>Akko badiduram kawuri kəji Isa Almasiwu Tada Alayeyedə. <sup>2</sup>Kuren curo kitawu Nawi Ishayayen ruwuwardadə gai:

«Nin fuwunno kəngayammi nodəkke  
niro jawalnəm cassai.<sup>†</sup>

<sup>3</sup>Tidə kam laa karaan kowo sapce:  
“Kəmandero jawal dabbargənowo,

---

<sup>†</sup>**1.2** Mal 3.1

koduramnju cèkko dewo!”  
cène wormaji.»†

<sup>4</sup> Nawi Yahaya Kasalama fèlediye karaan jamaro kawuri kasala tuwaye biwuwa gawurduye cèddi kërga. <sup>5</sup> Adègaima am lardu Yahudiyaye-a bërni Jerujalembe-a samma nanjuro isane biwunja wuljane curo bérèm Jordaniyen tayiro kasala tuwaye kiddo. <sup>6</sup> Yahayaye kajemunjudè kanduri karimoyen caaada, canjanju ye ngirin tikkerèna. Këmbonju ye kawi-a këmagèn-a. <sup>7</sup> Jamaro kawuri cèdde: «Kam laa wua kënduwon kosëna je sunonjuye ngunème wuiduma tikkèni ngawonin isi. <sup>8</sup> Wudè ingilan nayiro kasala ngeddèkko, amma tidè Ruhu Alayelan nayiro kasala njaddi,» yeno.

### Ruhu Alaye Isaro jëptuwu-a Yiwulisse Isaa jaraptu-a (Mat 3.13-17; 4.1-11; Luk 3.21-22; 4.1-13)

<sup>9</sup> Yim anin Isa bëla Najarat cidi Galileyedèn cije bérèm Jordaniyero ise Nawi Yahaya tiro kasala kiddo. <sup>10</sup> Isa ingidèlan kiluwunniyama, same farakko férèmde Ruhu Alaye alama bullam gai tiro jëpciyi kiro. <sup>11</sup> Koro samelan kowo nukce: «Nima Tadani wo, njëraakkëna. Niramnin jauro karwuni këjijëna!» yeno. <sup>12</sup> Sadëman Ruhu Alayedè tia cakke karaa dëfiro kiluwo. <sup>13</sup> Karaadèn kawu fidewuro Yiwulis tia jarapci kërga. Ti bundiya karaaye-a rokko, malaiyawa ye tiro ngissagai.

## KIDA ISAYE CIDI GALILEYEN

### Isaye kidanju badidu (Mat 4.12-17; Luk 4.14-15)

<sup>14</sup> Ngawo Nawi Yahayaa kosoro casakkènayen, Isa cidi Galileyero walde jamaro kawuri këji Alaye wulduwu

---

†1.3 Ish 40.3

badiyeno. <sup>15</sup> Tiye: «Sadə cədəna, nodo bargaa Alaye del karənjəna! Təmmowo, kawuri kəji Alayedəa kasaddowo!» yeno.

### **Isaye fuwurawanju burwoyea bowodu**

(Mat 4.18-22; Luk 5.1-11)

<sup>16</sup> Yim laa Isa ci bərəm Galileyea jəgai duwon, Siman-a yanjugəna Andarawus-a buni taramnja bərəmdəro fijagai kiro. Tayidə buni tawu. <sup>17</sup> Isaye tayiro: «Arowo wua səgaiwo, nayia kam tawuro njadəkki,<sup>s</sup>» yeno. <sup>18</sup> Sadəman buni taramnja koljane tia geya.

<sup>19</sup> Koro gana fuwuyenniya, Yakuba tada Jabadiye-a yanjugəna Yahaya-a curo maarayen buni taramnja caassai kiro. <sup>20</sup> Sadəman tayia bowoje cijane bawanja Jabadi-a kidawunju-aa curo maaradəyen koljane tia geya.

### **Isaye kam karuwaa isangaduwu**

(Luk 4.31-37)

<sup>21</sup> Daji Isa-a fuwurawanju-a bərni Kafarnaambero kadira. \*Yim tustuye kidənniyama, Isa dandallo ngaye jamaa alamdu badiyeno. <sup>22</sup> Jamadə alamdunjudəa ajapkera, dalilnjudə alamdunjudə maləmba Attaurayedə gai gəni, kənduwoaro manaji nangaro. <sup>23</sup> Sa adən curo dandalnjadəyen karuwama laa burwu cakke: <sup>24</sup> «A! Isa kam Najaratte, awi lambonəm andiro? Andia siduwuro wa kadim? Nia asunjəkkəna, nima Tayir Alayedə wo!»<sup>t</sup> yeno. <sup>25</sup> Amma Isa sedandəro jəkkade mana dapciye: «Cinəm jange kamdəa kolle luwe!» yeno. <sup>26</sup> Daji sedandə burwu dunoa cakke kamdəa jəjəkce kolje kiluwo. <sup>27</sup> Tayi samma ajapcane amanjaro: «Attə awi? Alamdu jiri bərin, diye! Kənduwoaro sedansoro wada ciya, jagai!» cani. <sup>28</sup> Sadəman lawar Isaye cidi Galileye ngaro tatargaada.

<sup>s</sup>1.17 kam tawu - Am duwon am gadea Isaa gawuro waljaro majaídə.

<sup>t</sup>1.24 Tayir Alayedə - Biwubawoma, am gade-a gade.

### Kalmaram: Yim tustuye

*Ala same-a dunia-a kawu arakkulan alakkeno. Kawu tulurre kidənniya, kidanju alaktuye cerənadəro, Ala tuskeno. Kawu tulurredəro tagənasso barga dəpciyə kaanjuro kido.*

*Ci Nawi Musayen Ala wada Israyilawuro ce curo mawuyen kawu arakkuro kida cado, amma kawu tulurredə bare kida cadənni, yim adə tussa tiro ambəccaa yeno. Jama Israyilawudə səbdúa yim tustuyero kedo.*

*Jaman Bargaande Isa Almasiwuyen wurawa adinwu kəwu Farisawaye awo ngəwusoro kida cane jamaro yim tustuya dio dapcaana, har bare am dondisoa yim tustuya isangajaganni cani.*

### Isaye am ngəwua isangaduwu

(Mat 8.14-17; Luk 4.38-44)

<sup>29</sup>Dandaldən keluwunniyama, Isa-a Yakuba-a Yahaya-a rokko fado Simanne-a Andarawusse-aro leyera. <sup>30</sup>Ya kəsai Simannedə dondi bowada, kange tia cədانا. Daji Isaro lawarnju wulyeyeranniya, <sup>31</sup>nanjuro leje mukkonju cədane tia kisango. Kangedə tia kolje, ti ye tayia sosadu badiyeno.

<sup>32</sup>Yim adəa kəngal kikkurunniya, am dondi-a karuwamaso-a sammaa na Isayero kewudo. <sup>33</sup>Am bərnidəye samma ci fadodəyen captana duwon, <sup>34</sup>Isa am kada kasuwa jiri jiria isangayeyeno, koro sedanna kada duyeno. Amma sedannadəro manadu amarjəgənni, ti wunduro nojana nangaro.

<sup>35</sup>Wajənanjua suwa ləp Isa tawaje culuwe na wunduma baworo leje nadən moduwa kido. <sup>36</sup>Siman-a amanju-a ye tia madaro keluwo. <sup>37</sup>Kewandənniya, tiro: «Am samma nia manjai,» yera. <sup>38</sup>Isaye tayiro: «Bəlawə gaderə leniyo, amnja

zero mana Alaye yiddékko! Adéma nangaro kadikko,» yeno.  
<sup>39</sup> Adégaima Isa bëla bëlaro leje dandalnjan ambo mana Alaye wuljiyi, sedanna ye duji ngai duwon, cidi Galileye sammaa diriyeno.

### **Isaye kam barasua isangaduwu**

(Mat 8.1-4; Luk 5.12-16)

<sup>40</sup> Kam barasua laa na Isayero ise tungurumje tia lowoje: «Raammaa, rangëme wua isangasëgëme tayirro wallëkki,» yeno. <sup>41</sup> Isa kamdëa njunoje mukko sajiye tia leje: «Raakkëna, tayirro walle!» yeno. <sup>42</sup> Sadëman barasudë tia kolje tayirro walyeno. <sup>43</sup> Daji Isa tiro marmarea cëdde tia salamgeno. <sup>44</sup> Tiro: «Bare awima wundumaro wulgëmmi, amma lene ñimandëro fëledëgëne. Tayirro wallëmmadë, sadaa Nawi Musa wuljënadëa de, jamaro shedaro waljo!» yeno. <sup>45</sup> Adë yaye kamdë leje ngëwuro manaje lawardëa ndarasoro tataryeyeno, har Isa bëla fimaro rakce federo ngayiwawo, sai karaa wunduma bawolan dëgai. Koro jama ndarasoyen yaye nanjuro isai.

### **Isaye kam tiyinju nunaa isangaduwu**

(Mat 9.1-8; Luk 5.17-26)

**2** <sup>1</sup> Ngawo kawu ganayen Isa bërni Kafarnaambero walladanniya, jamadë ti fadonno fangera. <sup>2</sup> Am ngëwu isane captane, har cinnaman na baworo walyeno. Tayiro mana Alaye cëddi duwon, <sup>3</sup> am dewu kam tiyi nunaa laa ngojane isane nanjuro kewudo. <sup>4</sup> Amma jama captana nangaro rakcane Isaa karënjaiwawodë, daji sorodëro jawane këla sorodëye na Isa dëganadëen kajane kamdëa këla bënaramnjuyen sayeyera. <sup>5</sup> Isa kambërsenjadëa kirunniya, kam tiyinju nunaadëro: «Tadani, biwunëm gawurdëna,» yeno.

<sup>6</sup> Daji malëmba Attauraye laa nadëen napkada karwunjyan:  
<sup>7</sup> «Awiro kam attë ngai wulji? Alaa gaskajëna, diye! Ala

gənia, wunduma kambo biwu gawurjiyi bawo, mare?» cani.<sup>8</sup> Sadəman Isa awo karwunjaye asuje tayiro: «Awiro karwundon awo ania wulluwidə? <sup>9</sup>Ndaso gəle kam tiyinju nunaa adəro budu wo: “Biwunəm gawurdəna” wulduma ra “Cine bənaramməm ngone lene!” wulduma?<sup>10</sup> Nonowo, Tada Kambedə<sup>u</sup> nanjun kənduwo biwu ambe dunialan gawurduye mbeji!» yeno. Daji kam tiyinju nunaadəro:<sup>11</sup> «Niro wulnjəgəkki, cine bənaramməm ngone fannəmbo lene!» yeno.<sup>12</sup> Sadəman kamdə fuwu am sammayen cije bənaramnju ngoje leyeno. Tayi samma jauro ajapcane Alaa congorəne: «Awo adə gai ngaltema ruiyende!» yera.

### **Isaye Lewia bowodu**

(Mat 9.9-13; Luk 5.27-32)

<sup>13</sup>Koro Isa walde ci bərəmberō kadio. Am kada kadami nanjuro isane tayia alamgeno. <sup>14</sup>Kodu cədi duwon, Lewi tada Alfawusse kidaramnju akki mowoyen napkadaa kiro. Isaye tiro: «Wua səgai!» yenniya, cije tia giya.

<sup>15</sup>Isa fado Lewiyen masənaro napcəna duwon, akki mowomaso-a biwuma gadeso-a kada ye ti-a fuwurawanju-a rokko masəna dioro napkera, tayi gai kada tia jaana nangaro. <sup>16</sup>Maləmba Attauraye kəwu Farisawaye laa Isa biwumaso-a akki mowomaso-a rokko masəna cadiro kerunniya, fuwurawanjuro: «Awiro Isa akki mowomaso-a biwuma gadeso-a rokko masəna cadidə?» yera. <sup>17</sup>Isa adəa fangenniya, tayiro: «Kam dondi gənia, kam ngadə lowotor majiwawo. Jiremasoa gəni, biwumasoa bowoduro<sup>v</sup> kadikko,» yeno.

<sup>u</sup>**2.10 Tada Kambedə** - Isa kəla Tada Kambedəyen manajiya, kəlanjuman manaji.

<sup>v</sup>**2.17 biwumasoa bowodu** - Tuwa cadoro.

## Kambiwu kəla asemen

(Mat 9.14-17; Luk 5.33-39)

<sup>18</sup> Fuwurawa Nawi Yahayaye-a Farisawaye-a asem<sup>w</sup> cadai duwon, am laa na Isayero isane tiro: «Awiro fuwurawa Yahayaye-a Farisawaye-a asem cadai, amma fuwurawanəm cadaiwadə?» cane keworo. <sup>19</sup> Isaye tayiro: «Mai larusaye dawunjan duwon, ngaladiya asem cadai wa? A'a, mai larusaye dawunjan duwon, asem cadaiwawo. <sup>20</sup> Amma sa ise mai larusayedəa dawunjan cattuluwiya, sa adən duwon asem cadai.

<sup>21</sup> «Wunduma guntu batta bərinne ingiro cakke captənni ngoje kajəmu dinaro cukkududiwawo. Ngai cədia, batta bərində dinadəyen capte kardudə cayemaro kuraro walji.

<sup>22</sup> Koro wunduma diben bərin ngoje satki dinaro fijiywawo. Ngai cədia, dibendə satkidəa falji.<sup>x</sup> Diben ye bawo, satki ye bawo. A'a, amso diben bərindəa satki bərinno fijagai,» yeno.

## Isa kəma yim tustuye

(Mat 12.1-8; Luk 6.1-5)

<sup>23</sup> Yim tustuya laa Isa-a fuwurawanju-a kulo algamaye rejane kojai duwon, fuwurawadə kəla algamaye fifirdu badiyera. <sup>24</sup> Farisawa laaye tiro: «Akko rui, awiro fuwurawanəm awo yim tustuya kəndoro haramdəa cadidə?» yera. <sup>25</sup> Isaye tayiro: «Sa Nawi Dauda-a amnju-a kəna fanjanadən, awo cədənadəa ngaltema kitawulan kəranuwvi wa? <sup>26</sup> Jaman Abiyatar riman kurayedən curo Fado Alayero ngaye burodi sadaaye ngoje jəgəre amnju yero ce gewo. Rimannaro gənia, am gadero burodi sadaaye ngərodə haram!»<sup>†</sup> <sup>27</sup> Daji Isaye tayiro: «Ala kamdəa yim

<sup>w</sup>2.18 asem - Asem adə faral gəni, nafila.

<sup>x</sup>2.22 dibendə satkidəa falji - Diben bərin mojogolje kuraro walji nangaro, satki dinadəa falji.

<sup>†</sup>2.26 1Sam 21.1-6

tustuye nangaro alakcənni, yim tustuyedəa kam nangaro alakkeno.<sup>28</sup> Adə nangaro Tada Kambedə kəma yim tustuye, diye!» yeno.

### **Isaye kam mukkonju canaa isangaduwu**

(Mat 12.9-14; Luk 6.6-11)

**3** <sup>1</sup>Koro Isa walde dandallo kərgawo. Nadən kam laa mukko canaa mbeji. <sup>2</sup>Am laa ye Isaro ayau gənaduwu caraana nangaro hangalnjayen tia ninijai, yim tustuyeaman kamdəa isangayeyenoaro. <sup>3</sup>Daji Isa kam mukko canaadəro: «Cine dawunden dane!» yeno. <sup>4</sup>Koro jamadəro: «Yim tustuya ngəla kəndo ra diwi kəndoma halal wo? Ro njəkkawo ra ro tuluwoma halal wo?» cəne kiworo. Amma gəm keto. <sup>5</sup>Isa gərgajə kəla karwukibbanjayen karwunju jauro kuttaje tayia ninije kamdəro: «Mukkonəm sane!» yeno. Sayenniya, mukkonju kəlewa salairo walyeno. <sup>6</sup>Farisawadə dandaldən keluwunniyama, lejane am Mai Hirudusse-a rokko sawardane jawal Isaa njejoye mayera.

### **Jama kadaye Isaa ga**

(Mat 4.23-25; Luk 6.17-19)

<sup>7</sup>Daji Isa-a fuwurawanju-a cijane ci bərəmberō leyera. Cidi Galileyen am kada kadami tia geya. Koro am lardu Yahudiyaye-a <sup>8</sup>Jerujalembe-a lardu Idumiyaye-a cidi adinnam bərəm Jordaniye-a cidi bərni Tirre-a Sidonne-ason kada kadami ye awo Isa cədisodəa fanjane nanjuro kadira. <sup>9</sup>Adəgaima Isaye fuwurawanjuro bare am kada captanadə tia gəgərəpcaganniro maara tiro dabbarja yeno. <sup>10</sup>Isa am kada isangajəgəna nangaro, am kasuwaasodə tia lejaro gəgərəptagai. <sup>11</sup>Sedanso ye tia caruiya, fuwunjun tungurumjane ngujane yiljane: «Ni Tada Alaye!» cani. <sup>12</sup>Amma bare tia isanojaganniro tayiro jauro kikkado.

## **Isaye këngayamba mewun yindindəa galadu**

(Mat 10.1-4; Luk 6.12-16)

<sup>13</sup>Daji Isa këla kauyero juwane am tayilan məradunjuadəa bowoje nanjuro kadira. <sup>14</sup>Curonjan mewun yindin këreje tayia këngayambanjuro galayeno. Nianjudə ti-a rokko napca, tayia cunodo leja kawurinjua jamaro wuljaa, <sup>15</sup>kënduwo sedan dudaye cawando. <sup>16</sup>Akko am mewun yindin galajənadə, tayima Siman kam tiro cu Biturus cakkənadə, <sup>17</sup>Yakuba tada Jabadiye, yanjugəna Yahaya-a, tayi yindi yero cu Bonaji cakkəna, maananjudə tadawa raduye,<sup>y</sup> <sup>18</sup>koro Andarawus, Filibus, Bartolomi, Matiyu, Toma, Yakuba tada Alfawusse, Tadawus, Siman kam Kan'anaye,<sup>z</sup> <sup>19</sup>Yahusa Iskariyot kam mukko kəladowayero Isaa sərəttuwumadə.

## **Kënduwo Isaye ndaran isi?**

(Mat 12.22-32; Luk 11.14-23)

<sup>20</sup>Daji Isa fadoro wallada. Jama kada ye caye gai captane, har Isa-a fuwurawanju-aro masəna kəmboro katker. <sup>21</sup>Kəramiyanju adəa fangeranniya, tia taro leyera, hangal tia maujəna cani nangaro. <sup>22</sup>Koro maləmba Attauraye Jerujalemlan isanadəye: «Beljabul<sup>a</sup> tia cədana! Kënduwo mai sedannayen sedanna duji,» yera. <sup>23</sup>Daji Isa tayia bowoje misalnin tayiro wuljiye: «Awiawin Yiwulis rakce Yiwulissa duji? <sup>24</sup>Kərmai duwon kəlanjuro yaktiyia, rakce dəgaiwawo. <sup>25</sup>Fado duwon kəlanjuro yaktiyia, fadodə ye rakce dəgaiwawo. <sup>26</sup>Yiwulis ye kəlanju lawalaje yaktiyia, rakce dəgaiwawo, dunonju cerəna. <sup>27</sup>Wunduma rakce fado kam dunoayero ngaye kəndanju cəmoyiwawo, sai kam dunoadəa cikkeriya duwon. Cikkeriya, kəndanju cəmoyi.

<sup>y</sup>3.17 tadawa raduye - Am ro doia.

<sup>z</sup>3.18 kam Kan'anaye - Kam lardunju rawoma.

<sup>a</sup>3.22 Beljabul - Mai sedannaye tiro Yiwulis cani.

<sup>28</sup> «Jiremaro nayiro wulnjagakki, biwu dio-a Alaa bastu-a samma kambo gawurdiyi. <sup>29</sup> Amma kam Ruhu Alayea bassimadə, təmmaro tiro gawurdiyiwawo. Biwu har abadaro gawurdiwawo cədo!» yeno. <sup>30</sup> Adəa wuldunjudə, ti karuwama cani nangaro.

### Isaye yanju-a yanjugənaso-a

(Mat 12.46-50; Luk 8.19-21)

<sup>31</sup> Isaye yanju-a yanjugənaso-a isane ci fadoyen dajane am tia bowojaro kenodo. <sup>32</sup> Am kada ye Isaa dirijane kəljane napcana duwon, tiro: «Yanəm-a yanəmgənaso-a deyan nia manjai,» yera. <sup>33</sup> Isaye tayiro: «Wunduso yani-a yanigənaso-adə wo?»<sup>b</sup> yenniya, <sup>34</sup> am nadən napcanadəa ninije: «Akko yani-a yanigənaso-adə! <sup>35</sup> Wundu duwon awo Ala cəraanaa cədimadə, tima yani-a yanigəna-adə wo!» yeno.

### Misalla Isaye

#### *Misal kasuni jəjərdumaye*

(Mat 13.1-9; Luk 8.4-8)

**4** <sup>1</sup> Koro Isa walde ci bərəmben jamaa alamdu badiyeno. <sup>2</sup> Am kada kadami nanjun captane, har maararo ngaye napkeno. Amdə samma ye cidilan ci bərəmdəyen dajana ngai duwon, <sup>2</sup> awo kadan misalnin jamaa alamgeno. Curo alamduñuyen tayiro: <sup>3</sup> «Fanowo, kam laa kuloro algama jəjərduro kiliwo. <sup>4</sup> Jəjərji ngai duwon, kasuni laa jawalnin fiyada. Daji ngudowa isane cotto gewo. <sup>5</sup> Kasuni laa ye na kau kaua katti ngəwu bawoalan fiyada. Katti ngəwu bawodəro, sadəman riyeno. <sup>6</sup> Amma kəngal samero tatkenniya, kausu jauje fərdü bawo nangaro rimje ngamgeno. <sup>7</sup> Kasuni laa ye na ngiwian fiyada. Ngiwidə rije algamadəa kimicciye,

---

<sup>b</sup>3.33 Wunduso yani-a yanigənaso-adə wo? - Isa yanju a fagatto nojəna yaye, na Alayen nankəramidə buye gəni, Ala-a Almasiwunju-aa kasattuye.

kəla cakkənni. <sup>8</sup> Amma kasuni laadə ye na katti ngəlaan fiyadanniya, rije kəla ficce nema tai daje kekko, laa tada fiakku fiakku, laa firakku firakku, laa mia mia,» yeno. <sup>9</sup> Daji Isaye tayiro: «Kam səmonjuamadə fanjo!» yeno.

*Dalil Isaye ambo misalnin manaduwuye*

(Mat 13.10-17; Luk 8.9-10)

<sup>10</sup> Na Isayen wunduma gade baworo walyenniya, tayi mewun yindində-a amnju gade tia dirijane kəljanadə-a kəla misalladəyen tia keworo. <sup>11</sup> Isaye: «Nayiro asər nodo bargaa Alaye noduro amardəgəna, amma tayi dawundon bawomasodəro awiso misalnin wuldiyi. <sup>12</sup> Ngaima: “Caruima, asujaiwawo. Fanjaima, cařiwawo. Adə gənia, Alaro waldane biwunja gawurdəna!”»<sup>†</sup> yeno.

*Maana misal kasuni jəjərdumaye*

(Mat 13.18-23; Luk 8.11-15)

<sup>13</sup> Koro Isa walde tayiro: «Misal adəa asunuwwi wa? Awiaxin gəle misal gade asunuwi? <sup>14</sup> Kasuni jəjərdumadə mana Alaye jəjərjo. <sup>15</sup> Kasuni kəla jawallen fidənasodə, tayima am manadəa fanjana duwon, sadəman Yiwulis ise mana tayilan fidənadəa cuttuluwidə wo. <sup>16</sup> Tayi na kauan fidənasodə ye, tayima am manadəa fanjaiyama, karwu kəjiaro camoyidə wo. <sup>17</sup> Amma tayilan fərdü bawo nangaro, tussaiwawo. Kəla manadəyen kuttu casaiya, bi am tayia basarjaiyama, wajane koljai. <sup>18</sup> Am laaso ye kasuni na ngiwan fidənasodə, tayima am manadəa fanjana duwon, <sup>19</sup> karwungai dio so, arsiyi mangardu so, awo gade luwaptu so karwunjaro ngasaane manadəa kəpcane tayiro faidajiyawodə wo. <sup>20</sup> Amma tayi na katti ngəlaan fidənasodə, tayima am manadəa fanjane ngojane karwunjan rojana tayiro faidajiyi, nema laa tadanju fiakku, laa firakku, laa mia mia casakkidə wo.»

---

<sup>†</sup>4.12 Ish 6.9-10

*Misal fatəlaye**(Luk 8.16-18)*

<sup>21</sup> Koro Isa walde: «Fatəladəa kəmon təmdaro ra cidiya dəgəllen gənaduro cawudi wa? A'a, tia kəla gənaduramnjuen gənaji. <sup>22</sup> Awima gəraada federo culuwiwawodə bawo, koro awima asərre isanodiwawodə ye bawo. <sup>23</sup> Kam səmonjuamadə fanjo!» <sup>24</sup> Koro tayiro: «Awo fanuwiro hangal gənanowo! Jiri ambo ngalgəwwadə gai, nayı yero ngalnjagai, koro adəa kojəna nayiro njasargai. <sup>25</sup> Kam nanjun awoamadə,<sup>c</sup> tiro casargai, amma kam nanjun bawomadə,<sup>d</sup> awo cədanadəmmaa tilan camoyi.»

*Misal kasuni rije wurajiye*

<sup>26</sup> Koro Isa walde: «Nodo bargaa Alayedə alamanju kam laa kasuni cidiro fijiyi gai. Fijiyiya, <sup>27</sup> bune yen kal, kausu yen kal bonewane cədi, kasunidə ye rije wuraji, amma jiri fin tədi nojənni. <sup>28</sup> Kattidəma cakke nema culuwi. Burwon kal cədiya, kəla ficci. Kəla cuttuluwiya, sim cədi. <sup>29</sup> Bafiyama, tawida ngoje cəwərdi, sa kalaye isəna nangaro.»

*Misal kasuni mutarre**(Mat 13.31-35; Luk 13.18-21)*

<sup>30</sup> Koro Isa walde: «Awiro nodo bargaa Alayea rattalgəiye? Misal fin gəle tia fisarniye? <sup>31</sup> Alamanju kasuni mutarre gai. Kasuni mutarredə, curo kasuniya am cidilan fijai sammayen tima təngəri wo. <sup>32</sup> Amma fijaiya, rije kəskawa jərwulan sammaro kura woro walje, dəlam kura kura cəde, har ngudososo rakcane kaudinjun fannja cadandi,» yeno.

<sup>c</sup>4.25 kam nanjun awoamadə - Kam mana Isaye fanjidə, nodunju cərgane caye kojənaro asuji.

<sup>d</sup>4.25 kam nanjun bawomadə - Kam mana Isaye fanjiwawodə, nodunju ganadəmmaa tilan camoyi.

<sup>33</sup>Kèla raktunja fanduyen Isa tayiro mana Alaya misal kada jiri adə gainin wulyeyeno. <sup>34</sup>Misalnin gənia, awima tayiro wuljəgənni. Amma sa nanjun jama baworo waljiya, fuwurawanjuro awiso fisarjiyi.

### Kənduwo Isaye kəla karuwa-a cambaldu ingiye-ayen

(Mat 8.23-27; Luk 8.22-25)

<sup>35</sup>Yim adəa dunia ləmdu cədi duwon, Isaye fuwurawanjuro: «Leniyo bərəmdəa falliyo ci ingiye todəro koniyo!» yeno.

<sup>36</sup>Daji jamadəa kolyeranniya, maaradən Isaa ngojane leyera. Maara gade ye rokkonjun mbeji. <sup>37</sup>Daji karuwa dunoa cije ingi bərəmbe cambalje maaradəro fidiyə, har maaradəa ləptu mayeno. <sup>38</sup>Sadən Isa ngawo maaradəyen kəlanju birlan kənəm cədi. Fuwurawanjudə tia kənəmnin kesangəranniya, tiro: «Sayinna, nuiye, ni lambonəm bawo wa?» yera. <sup>39</sup>Isa cije karuwadəro jəkkade ingi bərəmbedəro: «Waldəne gəm bone!» yenniya, karuwadə daje dunia gəmbo walyeno. <sup>40</sup>Daji Isaye tayiro: «Awiro yaayew? Kua yaye kambərsendo bawo wa?» yeno. <sup>41</sup>Fuwurawanjudə jauro rijane amanjaro: «A! Wundu gəle kam attə? Karuwa-a bərəm-ama mananju jagai!» yera.

### Kənduwo Isaye kəla sedannayen

(Mat 8.28-34; Luk 8.26-39)

**5** <sup>1</sup>Daji Isa-a fuwurawanju-a bərəmdəa faljane kojane cidi Gərasawuyero kadira. <sup>2</sup>Isa maaradəlan jəpkenniyama, karuwama laa kaurilalan culuwe tia kapkeyeno. <sup>3</sup>Kamdə kaurilalan kərgə, koro wunduma rakce tia cikkeriwawo. Sargalaman tia geroro yojiwawo. <sup>4</sup>Calan ngəwuro sinju-a mukkonju-aro sarga casakkəna yaye, kllum kəjan kəjanno kakamji. Wunduma rakce tia rojiwawo. <sup>5</sup>Bune-a kausu-a curo kaurila-a kauwa-ayen burwu cakke tiyinju kaunin rereji kərgə.

<sup>6</sup>Kamdə Isaa kuruwun kirunniya, cəgase ise fuwunjun tungurumje nguje <sup>7</sup>dunonjuro yilje: «Awi lambonəm wuro,

Isa Tada Ala Mai Samemayedə? Fuwu Alayen lowonjəkkəna, bare wuro ajawu gənasəgəmmi!» yeno. <sup>8</sup> Adəa wuldunjudə, Isaye calan tiro: «Sedan, kamdəa kolle luwe!» cənna nangaro. <sup>9</sup> Daji Isaye tiro: «Wundu cunəm?» cəne kiworənniya, tiye: «Cuni Kəwu Sojiyaye,<sup>e</sup> andi kada nangaro,» yeno. <sup>10</sup> Bare tayia cididəlan dujənniro Isaa ngəwuro lowoyeno. <sup>11</sup> Nadən alade kada kəla kau kuruwuyen newo cadi ye mbeji. <sup>12</sup> Koro sedannadə Isaa lowojane: «Aladeyadəro dusagane curonjaro ngayiyo!» yera. <sup>13</sup> Tayiro amarjiye caluve curo aladeyadəyero kasargawo. Daji aladeyadə alama dəwu yindi gai ngərəmjane kaulan jəpcane bərəmdəro fidagane ingiye ngoje kasuno.

<sup>14</sup> Səniya aladeyayedə cagase lejane bəladə-a karaanju-alan lawardəa ambo wulyeyera. Amdə ye awo wakkajənadəa kuroro keluwo. <sup>15</sup> Na Isayero isane kam duwon tilan kəwu sedannaye caluwunadə kajəmunju ye lujəna, hangalnju ye kalkaljəna napkada kerunniya, riyera. <sup>16</sup> Tayi lamar adəa carunadə awo karuwamadə-a aladeyadə-aro wakkajəgənadəa amdəro wulyeyera. <sup>17</sup> Daji amdə ye Isa cidinja koljoro tia lowodu badiyera. <sup>18</sup> Isa maaradəro ngayi duwon, kam tilan sedanna caluwunadə ye Isaa lowoje kasacco rokkonjun dəga yeno. <sup>19</sup> Isa tiro amarjəgənni, tiro: «Waldəne fannəmbo, ser kura Kəmande niro njəddənadə-a jifri nia njunonjənadə-a tayiro satkəgəne!» yeno. <sup>20</sup> Daji kamdə leje cidi Bəlamewuyen ser kura Isa tiro cəddənadəa ambo wulduwu badiyeno. Tayi samma ajapkera.

### Kənduwo Isaye kəla kəndondi-a karmo-ayen

(Mat 9.18-26; Luk 8.40-56)

<sup>21</sup> Koro Isa walde maaradən bərəmdəa falje koyenniya, jama kada isane tia dirijane kəlyera. Isa ci bərəmben duwon, <sup>22</sup> kam laa wurawa dandaldəye falnja cunju Jairus nadəro kadio. Isaa kirunniya, fuwunjun tungurumje <sup>23</sup> tia jauro

---

<sup>e</sup>5.9 Kəwu Sojiyaye - Soji dəwu arakku gai.

lowoje: «Feroni kəlayakku no cədi. Are mukkonəm tiro gənagəne, ngajo roaro dəgaro!» yeno. <sup>24</sup> Isa cije kamdə-a rokko leyera. Koro jama kada jaane tiro kəkəldagane tia gəgərəpkeyera.

<sup>25</sup> Kamu laa ye nadən mbeji, kərwu mewun yindinno bu fidanju<sup>f</sup> dajənni. <sup>26</sup> Mukko karwunma ngəwusoyen jauro leiya cana, koro kəndanju sammaa cuwatkəna yaye, kalkalnu cuwandənni, kasuwadə fuwu juwui. <sup>27</sup> Daji lawar Isayedəa fangenniya, kamudə ise ngawoyen susuje kalwunjudəa leyeno, <sup>28</sup> awoa karwunjun: «To, kajəmunju bas lekkia, ngakki,» cəni. <sup>29</sup> Sadəman bu fidanju dayeno, koro nanlewa cuwandənaro tiyinjun fangeno. <sup>30</sup> Sadəman Isa ye kənduwo tilan culuwunaro asuje dawu jamadəyen suworde: «Wundu kalwuni lejo?» cəne kiworo. <sup>31</sup> Fuwurawanjudəye tiro: «A! Jamadə niro kəkəldagane gəgərəmnjaana rumma duwon, wundu nia lenjoro korəmidə?» yera. <sup>32</sup> Amma Isa memeje kam adəa cədənadəa kuroro mayeno. <sup>33</sup> Kamudə awo tiro wakkajəgənadəa nojəna nangaro, rije lolojiaro ise fuwunjun tungurumje tiro jiredə ngaa wulyeyeno. <sup>34</sup> Daji Isaye tiro: «Feroni, kambərsenəm nangaro njəkkawo fandəmma! Kəlewan lene, nanlewa yade!» yeno.

<sup>35</sup> Isa tiro manajiyi ngai duwon, am laa fado kam kura dandaldəyen isane tiro: «Feronəm bawojəna. Awiro maləmdəa gadəro suwolləmi?» yera. <sup>36</sup> Amma Isa awo wuljaidəa fangenniya, kura dandalledəro: «Bare rinəmmi, biya yasarai!» yeno. <sup>37</sup> Biturus-a Yakuba-a yanjugəna Yahaya-a gənia, bare wunduma gade tia jəganni yeno. <sup>38</sup> Fado kam kura dandalledəyero kadiranniya, Isa jama captana kalala fijai kiro, laa so cadi, laa waiyo cani. <sup>39</sup> Kərgaanniya, Isaye tayiro: «Awiro kalala finuwi ye, so diwi yedə? Ferodə bawojənni, kənəm cədi,» yeno. <sup>40</sup> Amma tia rujane tiro kaasu keddo.

<sup>f</sup>5.25 bu fidanju - Salanambu.

Amdə sammaa deyaro kittuluwunniya, ferodəye bawa-a ya-a am tia casadduwunadə-aa ngoje na ferodəyero kasargawo.<sup>41</sup> Ferodəa mukkoyen kidanniya, tiro: «Talita kum!» yeno, maananjudə: «Feroma, niro wulnjəgəkki, cine!»<sup>42</sup> Sadəman ferodə cije dadadu badiyeno. Tidə kərwunjū mewun yindin. Adəa kerunniya, jauro ajapkera.<sup>43</sup> Daji Isa wada ce tayiro bare wunduma lawar adəa fanjənni yeno. Koro awo kəmboye ferodəro cado yeno.

### **Am bəla Najaratte Isaa wadu**

(Mat 13.53-58; Luk 4.16-30)

**6** <sup>1</sup>Daji Isa nadəa kolje bəla wurajənadəro kadio. <sup>2</sup>Fuwurawanju ye tia geya. <sup>3</sup>Yim tustuya dandallan jamaa alamdu badiyeno. Am tia kərənjana ngəwuso ajapcane: «Ndaran kam attə awo ania kiwando? Nanrashidu tiro tina attə awi? Koro ndayilan awo ajabba ajabba mukkonjuyen tədi? <sup>4</sup>Ti gəna katako karoma, tada Merambe, yeiya Yakubaye-a Josiye-a Yahuṣaye-a Simanne-adə wo? Koro yanjugəna ferowadə-a rokko kərgaiye, mare?» cane tia kasatturo wayera. <sup>5</sup>Isaye tayiro: «Nawi curo bəlanjayə-a durnjuye-a am fannjaye-aro kajia, darajanjua,» yeno. <sup>6</sup>Adə nangaro nadən awo ajabba ajabba rakce cədənni, sai am dondi gana laaro mukkonju gənajiye tayia isangayeyeno. <sup>7</sup>Adəgaima Isa kəla kambərsenambunjayen ajapkeno. Daji bəla bəlaro leje jamaa alamdu badiyeno.

### **Isaye kəngayambanju mewun yindindəa nodo**

(Mat 10.5-15; Luk 9.1-6)

<sup>7</sup>Daji Isa mewun yindindəa bowoje tayiro kənduwo kəla sedannayen ce tayia yindi yindiyen nodo badiyeno. <sup>8</sup>Tayiro wada ce bəlawurodəro ka gənia, bare awima ngojanni: kəmbo, bi ngərwu, bi wuri,<sup>9</sup> koro suno casakko, amma bare gəmaje yindi ngojanni yeno. <sup>10</sup>Koro tayiro: «Ndaran yaye fado ngawuwwadən nammowo, har kawu nadəa kolluwiro.

<sup>11</sup> Amma ndaran yaye nayia njamowonni bi manando fandu wayeraa, nadæa kolluwiya, katti sindoye kagangowo,<sup>g</sup> tayiro shedaro waljo!» yeno. <sup>12</sup> Adægaima kengayambanjudæ lejane ambo kawuri cadde tuwa cado yera. <sup>13</sup> Sedan kada duyera, koro am dondi kadaro këndawu jaitunne fijagane samjagane tayia isangayeyera.

### Mai Hirudusse Nawi Yahayaa roro njejo

(Mat 14.1-12; Luk 9.7-9)

<sup>14</sup> Mai Hirudus lawar ani sammaa fangeno, dalilnjudæ cu Isayedæ ndarasoro tatardægæna nangaro. Am laaye: «Yahaya Kasalama roaro walje cijo! Adæma nangaro kënduwo awo ajabba ajabba dioye nanjun mbeji,» cani. <sup>15</sup> Laaye: «Ti Nawi Iliya,» cani. Laaye: «Ti nawi, nawiya kureye falnja gai,» cani. <sup>16</sup> Amma Mai Hirudus adæa fangenniya, tiye: «Yahaya kam këlanju kammækkenadæ roaro walje cijo!» yeno.

<sup>17</sup> Caman Mai Hirudus Ya Hirudiyaa, ti kamu yanjugæna Mai Filibusse duwon, kamuro cemowona. Ti nangaro, Mai Hirudus cakke Yahayaa cadane cekkere kosoro kesakko, <sup>18</sup> dalilnjudæ Yahayaye Mai Hirudusso: «Kamu yanæmgænaye mowodæ haram!» cenna nangaro. <sup>19</sup> Koro Ya Hirudiyaa Yahayaa wul wajæna, har tia roro njejoro maji. Amma jawal cuwandænni, <sup>20</sup> dalilnjudæ Mai Hirudus Yahayadæ jirema ye, kam Alaye yero asujiye tia rije cériwi nangaro. Mai Hirudus tia kærænjiya, hangalnu ciji, adæ yaye mananju fanduro céraana.

<sup>21</sup> Ngaima duwon Ya Hirudiyaye sanju kadio.<sup>h</sup> Saanduri Mai Hirudus tambænaye kidænniya, Mai Hirudus wakkillanju-a kajallawanju-a amwurawa cidi Galileye-aro masæna kæji dabbar eyeno. <sup>22</sup> Fero Ya Hirudiyaye ise bikke kirandænniya, Mai Hirudus-a kusottowanju-a ye karwunja jauro kæjiyeno.

<sup>g</sup>6.11 katti sindoye kagangowo - Sæmo kasta, maananjudæ wowom Alayero tayia koljagai.

<sup>h</sup>6.21 Ya Hirudiyaye sanju kadio - Sanju kënnasar fandoye kadio.

Mai Hirudusse ferodero: «Awi yaye ronəm cəraanadəa suwore niro njikke!» yeno. <sup>23</sup>Kansi juwune tiro: «Kore! Awodə reda cidiniyero walyeno yaye, niro njikki,» yeno. <sup>24</sup>Daji ferodə culuwe yanjuro: «Yani, awiro tia korəkki?» yenniya, Ya Hirudiyaye: «Kəla Yahaya Kasalamaye!» yeno. <sup>25</sup>Sadəman ferodə dəgalje na Maidəyero walde tiro: «Wuro kərmamaro kəla Yahaya Kasalamaye curo buwuruyen simiya, raakko!» yeno. <sup>26</sup>Maidə karwunju jauro kuttu yaye, kansi bonju-a kusottowanju-a nangaro ferodero daptuwu cəraanni. <sup>27</sup>Sadəman kowonanju laaro wada ce kəla Yahayayedəa cuwudo yeno. Kowonadə leje kosolan kəla Yahayaye kamje <sup>28</sup>kəlanjudəa buwurulan cuwude ferodero kaino, ti ye ngoje yanjuro kaino. <sup>29</sup>Fuwurawa Yahayaye lawar adəa fangeranniya, isane kaminnju ngojane caade kauriro casakke sənayera.

### **Isaye am dəwu uwu ambadu**

(Mat 14.13-21; Luk 9.10-17; Yah 6.1-15)

<sup>30</sup>Kəngayambadə na Isayen captane awo cadəna-a jiri jamaa alamjana-a sammaa tiro wulyeyera. <sup>31</sup>Isaye tayiro: «Arowo runde karaa na wunduma bawo laaro leniyo, tussowo!» yeno, dalilnjudə am kada kadami nanjaro isane waldai, har dama masəna dioyemaa cawandənni nangaro. <sup>32</sup>Daji tayi runja maararo ngasaye karaa na wunduma baworo leyera. <sup>33</sup>Amma ledu cadilan am kada tayia carune asujane bəla samman caluwe silan cagase tayin fuwunno nadəro leyera. <sup>34</sup>Isa maaradən jəpkenniya, jama kada captanadəa cure tayia njunoyeno, tayi alama dimiya səni bawoa gai nangaro. Daji awo kadan tayia alamdu badiyeno. <sup>35</sup>Dunia ləmgenniya, fuwurawanju isane tiro: «Na adə karaa bowu, koro dunia ye ləmjəna. <sup>36</sup>Jamadəa salamme, bəla-a bəladeya-asoro leja awo kəmboye cesiwo!» yera. <sup>37</sup>Amma Isaye tayiro: «Nayima awo kəmboye tayiro yowo!» yeno.

Tayiye: «A! Leniye kəmbo dinariyus<sup>i</sup> yer yindia yiwiye tayiro yiye wa?» yera.<sup>38</sup> Isaye: «Burodi ndawu taw? Lenowo ruiwo!» yeno. Lejane kerunniya, tiro: «Uwu buni yindi-a,» yera.<sup>39</sup> Daji Isa wada ce jamadəa yakca kəwu kewuro kəla kajim kəriyen napca yeno.<sup>40</sup> Adəgai amdə yaktane laa mia mia, laa fiwu fiwuro napkera.<sup>41</sup> Daji burodi uwudə-a buni yindidə-a ngoje kəla samero sapce Alaro ardiyenniya, burodidəa fəsakce fuwurawanjuro ce fuwu jamadəyen gənayera. Koro buni yindidə yea tayi sammaro dagaryeyeno.<sup>42</sup> Tayi samma jawune kulyera.<sup>43</sup> Fuwurawadə gaptowo burodiye-a buniye-aa capkeranniya, jowo mewun yindin kesəmbəro.<sup>44</sup> Am burodi adəa jawunadə kongwa dəwu uwu.

### Isaye kəla ingiyen silan ledu

(Mat 14.22-36; Yah 6.16-24)

<sup>45</sup> Sadəman Isa fuwurawanjudəa cakke tin fuwunno bərəmdəa koja ci todəro bəla Baitsaidayero lejaro maararo kasargawo, ti ye jamadəa salamji yeno.<sup>46</sup> Tayia salamgenniya, moduwa dioro kəla kau kuruwuyero giwa.<sup>47</sup> Kəngal kikkurənniya, maaradə dawu ingiyen, Isa ye ti tilonju lok kəla kauyen.<sup>48</sup> Karuwa dunoa nangaro fuwurawanju kiaddin fuwuro lejairo kirunniya, Isa sa yakku buneyen kəla ingiyen silan nanjaro kadio. Karənnjayan kodu cəraana duwon,<sup>49</sup> Isa kəla ingiyen silan ledu cədidəa kerunniya, kaime kam nunaye cane burwu kesakko.<sup>50</sup> Tayi samma tia caruna ye, karwunja kamdəna ye. Sadəman Isa tayiro manajiye: «Karwundo gerowo, wuma! Bare rinuwvi!» yeno.<sup>51</sup> Daji tayiro kəldiyəe maaradəro kərgaanniya, karuwadə gəm nəmgeno. Tai dajane ajapcana,<sup>52</sup> dalilnjudə maana lamar burodi uwuyedəa asujanni, kəlanja tikkerəna nangaro.

---

<sup>i</sup>6.37 dinariyus - Dinariyus faldə alwası kida kawu falle.

<sup>53</sup>Daji bərəmdəa faljane koyeranniya, cidi Gennesarettero isane maaradəa kekker. <sup>54</sup>Maaradən jəpkeranniyama, am cidiidəye Isaa asuyera. <sup>55</sup>Adəgaima amdə cagase cidiidə ngaro tatardagane amnja dondiso kəla bənaramnjayen ngojane ndara yaye na ti mbeji fanjanadəro njado badiyera. <sup>56</sup>Bəladəya, bi bəla, bi bəla kuloye, biya ndara duwon na lejəna ngasoro am dondisodəa ngojane cawudəne ci kalwunjuye runju lejaro tia lowoyer. Am kalwunjudəa lejana samma ngayera.

### Tayir-a tayir gəni-a

(Mat 15.1-20)

**7** <sup>1</sup>Farisawa-a maləmba Attauraye laa-a Jerujalemlən isane na Isayen capkadaran niya, <sup>2</sup>fuwurawanju laa mukkonja tayir gəni bəri jawui kero, maananjudə mukkonja tuljanni. <sup>3</sup>Wotte Farisawadə-a yaudiya samma-a ada amwurawanjaya jaane mukkonja kalkallo tuljannia, kəmbo jawuiwawo. <sup>4</sup>Kasuwulan isaiya, kasaldannia, kəmbo jawuiwawo. Koro ada gade kada cadana cadi mbeji, gəmdowolom so, tasa so, kulo so tulda gai. <sup>5</sup>Daji Farisawa-a maləmba Attauraye-aye Isaro: «Awiro fuwurawanəmdə ada amwurawayedəa koljane mukkonja tayir gənin kəmbo jawuidə?» cane tia keworo. <sup>6</sup>Isaye tayiro: «Nayi mənafəkkaso, awo Kəmande kuren ci Nawi Ishayayen kəlandon wuljənadə jire, kitawulan ruwuwendə gai. Tiye:

“Jama adə cilan wuro daraja sadı,  
amma karwunjan nanin kuruwujana.

<sup>7</sup> De sullo wua ambənsagai,  
alamdunjadə wada kambe,”<sup>†</sup> cənna.

<sup>8</sup> Wada Alaye kolluwe ada kambe gawwa.»

---

<sup>†</sup>7.6-7 Ish 29.13

<sup>9</sup>Koro tayiro: «Fagat, wada Alaye wanuwe adando garo jauro nonuwwa! <sup>10</sup>Kuren Nawi Musaye: “Bawanəm-a yanəm-aro daraja ye!”<sup>†</sup> koro “Kam duwon bawanju bi yanjua bassənamadə, tia roro ceyeso!”<sup>†</sup> cənna. <sup>11</sup>Amma nayiye: “Kam bawanju-a yanju-aro: ‘Awo nanin nuwandoro təmanuwwadəa Alaro gənaakkəna,’ cənia, <sup>12</sup>bare gadero bawanju-a yanju-aro banajəgənni,” nuwi. <sup>13</sup>Adəgaima adando tatarnuwe mana Alayedəa bowuro kalakkew. Koro awo kada jiri adə gai diwi,» yeno.

<sup>14</sup>Daji Isa walde jamadəa nanjuro bowoje tayiro: «Nayi samma fanowo, asunowo! <sup>15</sup>Awima awo deyalan curo kambero ngaye kamdəa tayir gəniro cədima bawo, amma awowa curo kamben caluwidə, tayima kamdəa tayir gəniro cadi wo. <sup>16</sup>[Kam səmonjuamadə fanjo!]» <sup>17</sup>Isa jamadəa kolje fadoro kərgaanniya, fuwurawanjudə kəla misal adəyen tia keworo. <sup>18</sup>Isaye tayiro: «A! Nayi ye kəla jakkadaa wa? Awi yaye deyalan curo kambero ngaanadə kamdəa tayir gəniro cədiyaworo nonuwvi wa? <sup>19</sup>Dalilnjudə karwunjuro gəni, curonjuro ngaye tiyinjuyen culuwi,» yeno. Adəgainin kəmbo samma halallo asuyeyeno. <sup>20</sup>Isaye walde tayiro: «Awo curo kamben culuwidə, tima kamdəa tayir gəniro cədi wo. <sup>21</sup>Dalilnjudə niadiwi so, jarawa so, nambarwu so, kam njejo so, <sup>22</sup>kənjəna so, mangar so, nankəlado so, curoyindi so, nanjane so, nandəri so, ngadar so, rokura so, hangalnambu so karwu kambedəman caluwi. <sup>23</sup>Awo diwi ani samma curo karwudəyen caluve kamdəa tayir gəniro cadi,» yeno.

### Kamu lardu kərdiyaye ser Alaye fando

(Mat 15.21-28)

<sup>24</sup>Daji Isa cije nadəa kolje lardu bərni Tirre-a Sidonne-ayero<sup>j</sup> leyeno. Bare wunduma ti mbejiro asujənniro

<sup>j</sup>7.24 lardu bərni Tirre-a Sidonne-aye - Lardu kərdiyaye.

<sup>†</sup>7.10 NL 20.12; SK 5.16

<sup>†</sup>7.10 NL 21.17; Lew 20.9

fado laaro kərgawo, amma gəradunjudə yojənni.<sup>25</sup> Kamu laa feronju kəlayakku karuwaa lawar Isaye fangenniya, ise fuwunjun tungurumgeno.<sup>26</sup> Kamudə lardu Gəresse tia cidi Siri-Fenisiyelan kesambo. Daji Isa sedandəa feronjulan dujoro tia ngəwuro lowoyeno.<sup>27</sup> Isaye tiro: «Kolle burwon yalla jawo kulja, kəmbo yallayedəa ngonəme kərisoro njodə jussənni!» yenniya,<sup>28</sup> kamudə tiro kalakciye: «Aaa, Kəma. Adə yaye kərisodəma kəmbo yalla koljane cidiro cukkurunadəa jawui,» yeno.<sup>29</sup> Daji Isaye tiro: «Kəla mananəm adəyen lene, sedandə feronəmlan culuwuna,» yeno.<sup>30</sup> Adəgaima kamudə fadoro walladanniya, feronju kəla dəgəllen bowada nayeyeno, koro sedandə tilan culuwuna.

### **Isaye kam muwa ye, kəgənji ye isangaduwu**

<sup>31</sup> Daji Isa lardu bərni Tirredəa kolje cidi bərni Sidonneyen koje bərəm Galileye cidi Bəlamewudəyero kadio.<sup>32</sup> Nadən tiro kam laa muwa ye, kəgənji ye cakkude Isaa lowojane mukkonju tiro gənajuwo yera.<sup>33</sup> Isa kamdəa dawu am captanayen səgəriro kittuluwunniya, ngulondonju curo səmo yindi kamdəyero cakke lalları təwaje təlam kamdəyea leyeno.<sup>34</sup> Daji Isa kəla samero sapce captiye sinje: «Efata!» yeno, maana efatayedə fərəmdəne.<sup>35</sup> Sadəman səmo kamdəye fərəmde, awo təlamnjuro mana dapcəgəna ye wuide, farakko manadu badiyeno.<sup>36</sup> Isa amdəro wada ce bare wundumaro wuljaganni yeno. Amma wada ce sapciyi yaye, cayemaa kojənarо manajaidəma.<sup>37</sup> Amdə jauro naa kojənarо ajapcane: «Awisoa kalkallo cədəna, har muwasoa fanjairo cədi ye, kəgənvisoа manajairo cədi ye!» cani.

### **Isaye am dəwu dewu ambadu**

(Mat 15.32-39)

**8**<sup>1</sup> Yim anin caye gai jama kada na Isayen mbeji, koro awima kəmboye nanjan bawo. Daji Isa fuwurawanju

nanjuro bowoje tayiro: <sup>2</sup>«Jama kada adəa njunokkəna, dalilnjudə ku rokkonilan kawunja yakku, koro awima kəmboye nanjan bawo nangaro. <sup>3</sup>Kənanja duwon tayia fannjaro lejaro salamməkkia, jawallan dunonja baworo walji, laanja kuruwun isana nangaro,» yeno. <sup>4</sup>Fuwurawadəye tiro: «Ndaran gəle karaa adən kam rakce kəmbo cuwande jama ania ambaji?» yera. <sup>5</sup>Isaye tayiro: «Burodi ndawu nandon?» cəne kiworənniya, tiro: «Tulur,» yera.

<sup>6</sup>Daji Isa jamadəa cakke cidin napkera. Burodi tulurdəa ngoje Alaro ardiyenniya, fəsakce fuwurawanjuro ce fuwu jamadəyen gənaja cəne fuwunjan gənayera. <sup>7</sup>Buni sanana ye nanjan mbeji. Isa bunidə yea ngoje Alaro ardiyenniya, fuwurawanjuro ce fuwu amdəyen gənaja yeno. <sup>8</sup>Jamadə jawune kulyera. Fuwurawadə gaptowodəa capkeranniya, jowo kalaram tulur kesəmbəro. <sup>9</sup>Nadən am alama dəwu dewu gai mbeji. Daji Isa jamadəa salamgenniyama, <sup>10</sup>ti-a fuwurawanju-a maararo ngasaye cidi Dalmanutayero leyera.

## Alama sameye mada

(Mat 16.1-4)

<sup>11</sup>Daji Farisawa laa isane kambiwu Isaro njəddo badiyera. Tia rijapturo alama laa sameye tayiro fəlejuworo mayera. <sup>12</sup>Amma Isa captiye sinje: «Awiro am jaman adəye alama majaidə? Jiremaro nayiro wulnjagakki, alama fima am jaman adəyero fəlediyiwawo,» yeno. <sup>13</sup>Daji tayia kolje maaradəro walde ngaye bərəm falje kanji todəro koyeno.

## Yis Farisawa-a Mai Hirudus-aye

(Mat 16.5-12)

<sup>14</sup>Fuwurawadə ngessane burodi ngojanni. Burodi fal curo maaradəyen gənia, nanjan awo kəmboye bawo. <sup>15</sup>Isa səmonja kasse tayiro: «Yis Farisawaye-a Mai Hirudusse-aro hangal gənanowo!» yeno. <sup>16</sup>Tayidə kattenjan kəla burodinja bawoyen mana badiyera. <sup>17</sup>Isa adəa asuje tayiro: «Awiro kəla

burodi nandon bawoyen mananuwidə? Ra, kua yaye ruwe asunuwwi wa? Nayi kəla tikkerənaa wa? <sup>18</sup> Simndoaa duwon ruwwawo wa? Səmondoaa duwon fanuwwawo wa? Ra, nayi ngeskada? <sup>19</sup> Burodi uwu am dəwu uwuro fəsakkeykkəniya, gaptowodən jowo ndawu yimbəruw?» yeno. Tiro: «Mewun yindin,» yera. <sup>20</sup> Isaye: «Koro burodi tulur am dəwu dewuro fəsakkeykkəniya, gaptowodən jowo kalaram ndawu yimbəruw?» Tiro: «Tulur,» yera. <sup>21</sup> Daji tayiro: «To, kua yaye asunuwwi wa?» yeno.

### **Isaye kambu isangaduwu**

<sup>22</sup> Isa-a fuwurawanju-a bəla Baitsaidayero kadiranniya, am laa kambu laaa cawude Isaa lowojane kamdəa lejo yera. <sup>23</sup> Daji Isa mukko kambudəyea cədane tia jeje ngawo bəlayero kittuluwo. Simnjuro lallari təwajiyə tiro mukko gənajiyə: «Awo laa rumi wa?» cəne tia kiworo. <sup>24</sup> Kambudə kəla sapce: «Aaa, am rukki, amma alamanja kəska dadajai gai,» yeno. <sup>25</sup> Koro Isa walde simnjuro mukko gənayeyenniya, ricce sim cuwande awiso farakko curuiro walyeno. <sup>26</sup> Daji Isaye: «Bare bəladəmaro waldəmə ngaammi!» cəne kamdəa salamje fadoro lejo yeno.

### **Biturusse Isama Almasiwu Alayedə woro asudu**

(Mat 16.13-20; Luk 9.18-21)

<sup>27</sup> Isa-a fuwurawanju-a bəladeyaso cidi bərni Kaisariya Filifiyen dasaanadəro leyera. Kəla jawallen duwon, Isaye fuwurawanjuro: «Wunduro wua amsodə ngosera?» cəne tayia kiworo. <sup>28</sup> Tayiyə: «Am laa Yahaya Kasalama cani, laa ye Nawi Iliya cani, laa ye nawiya kureye falnja cani,» yera. <sup>29</sup> Daji Isa walde: «Nayidə, wunduro wua ngosew?» cəne tayia kiworənniya, Biturusse: «Nima Almasiwudə wo!» yeno. <sup>30</sup> Amma Isa səmonja kasse tayiro bare wundumaro ti wunduro wuljaganni yeno.

## Isaye kəla karmonju-a cidunju-ayen wuldu

(Mat 16.21-28; Luk 9.22-27)

<sup>31</sup> Koro Isa fuwurawanjuro Ala kadarjəna \*Tada Kambedə kuttu tai daje cane amwurawa-a wurawa rımannaye-a maləmba Attauraye-a tia wajane roro ceyesi, koro kawu yakkua roaro walje ciji cène tayia alamdu badiyeno. <sup>32</sup> Adəa federo tayiro wulyeyeno. Biturus tia səgəriro cuttuluwe tiro njəkkado badiyeno. <sup>33</sup> Amma Isa suworde fuwurawanjua kirunniya, Biturusso jəkkade: «Nani kolle, Yiwulis! Awo karwunəmlan tammadə Alaye gəni, kambe!» yeno.

<sup>34</sup> Daji Isa jamadə-a fuwurawanju-aa nanjuro bowoje tayiro: «Kam laa wua ga cəraanaa, məradu kəlanjuye wajo kəskanju karmoye<sup>k</sup> ngojo wua səga. <sup>35</sup> Dalilnjudə wundu duwon ronju rıwo cəraanamadə ronjudəa cuwatki, amma wundu duwon wu-a kawuri kəji Alaye-a nangaro ronju cuwatkənamadə ronjudəa cəriwi. <sup>36</sup> Kam dunia adə ngaa jəgande ronju asarjiya, nda riwanju? <sup>37</sup> Awi gəle kam ce ronju cuwandi? <sup>38</sup> Wundu duwon jaman diwi Alaro nan'ansi njəddoye adən kəla wu-a manani-ayen nangujənamadə, Tada Kambedə ye daraja Bawanjuyen malaiyawa sameye-a rokko isiya, **9** tia nanguji,» yeno. <sup>1</sup> Koro Isa walde: «Jiremaro nayiro wulnjagakki, am laa na adən daada mbeji, kawu kawunja dajidəro, nodo bargaa Alaye kənduwoaro walde isi carui,» yeno.

### Kalmaram: Tada Kambe

*Alama kərwu yer uwu gai kawu Bargaande Isa Almasiwu tambidəro, Nawi Daniyel kənnasimlan kuris Alaye-a malaiyawa kada kadami-aa kiro. Nawi Daniyel curui ngai duwon, alama adamgənaye laa curo fofou sameyen ise kuris Alayedəa nayeyeno. Ala tiro kənduwo-a daraja-a*

<sup>k</sup>8.34 kəska karmoye - Kəska duwon tiro kam jajagane nuidə.

*kärmai-aa ce jama duniaye samma tiro ambatkeyera. Kärmäinjuda sawisoro dägai, tämmaro ceriwawo. Kam käljun Nawi Daniyel mana cädänadə tima Isa Almasiwudə wo.*

*Bargaande Isa ngəwuro kaala Tada Kambedən faidade käljunia adamgənaye kuranjadəro ngoyeno. Awi maananjudə? Jiri awo kitawulan ruwuwardadə gai, Ala kadarjəna Tada Kambedə kuttu tai daje cane wurawa adinwu yaudiyaye tia wajane roro keyeso, koro kawu yakkua roaro walje ciyeno. Adəgaima ti biwu cädannidə biwu duniaye ngoje, har Ala ronju njodə ardiye ambo gawara kaino. Adəma nangaro Tada Kambedə nanjun känduwo biwu ambe dunialan gawurduye mbeji, koro ambo wowom gənaduwuye ye mbeji. Kiyama wakkajiya, Tada Kambedə duniaro walde ise jama duniaye sammaro shara cəddi.*

---

### **Isaye darajanjua fəledu**

(Mat 17.1-13; Luk 9.28-36)

<sup>2</sup> Ngawo adəyen kawu arakkua Isa cije Biturus-a Yakuba-a Yahaya-a runjaa ngoje kəla kau kuruwu laayero gewa. Fuwunjan Isaye alamanju falde <sup>3</sup> kajəmunju ye bul fok tai daje yiyiljiro walyeno, jiri wunduma dunialan kare tulje rakce buljiyawodə gai. <sup>4</sup> Koro Nawi Iliya-a Nawi Musa-a tayiro fəledagane Isa-a jandedu badiyera. <sup>5</sup> Daji Biturusse Isaro: «Sayinna, andi na adən mbejidə jauro ngəla. Kolle ngurwo yakku lammiyo: fal kaanəm, fal Nawi Musaye, fal ye Nawi Iliyaye,» yeno. <sup>6</sup> Awo wuljidəmaa nojənni, tayi rijana nangaro. <sup>7</sup> Daji fofou ise tayia jakkeno. Curo fofoudəyen kowo nukce: «Adəma Tadani wo, tia jauro raakkəna. Mananju fanowo!» yeno. <sup>8</sup> Sadəman memeyeranniya, Isa tilonju lon gənia, wundumaa carunni.

<sup>9</sup>Kèla kaudøyen jèpcai duwon, Isa tayiro sapciye bare awo caruna adəa wundumaro wuljaganni, sai Tada Kambedə karmolan cijiya duwon yeno. <sup>10</sup>Tayi ye lamar adəa curonjan royera, amma awi maana karmolan ciduyedə woro kattenjan tawori kasarga. <sup>11</sup>Daji fuwurawadəye tiro: «Awiro maləmba Attaurayedə sai Nawi Iliya burwoje isi<sup>1</sup> canidə?» cane tia keworo. <sup>12</sup>Isaye tayiro: «Jiremaro Nawi Iliya burwon ise awiso kalkallo kalakci. Awiro gèle kitawulan Tada Kambedə tai daje kuttu cane am tia rujane wajai ruwuadadə? <sup>13</sup>Amma nayiro wulnjagakki, Nawi Iliya isəna, koro awiso kuttu ronja cəraanaa tiro keddo, jiri kəlanjun kitawulan ruwuadadə gai,» yeno.

### Isaye tada karuwaa isangaduwu

(Mat 17.14-21; Luk 9.37-43a)

<sup>14</sup>Na fuwurawa gapcanadəyero kadiranniya, am kada kadami tayia dirijane kəljana, koro maləmba Attauraye ye tayiro kambiwu caddi kero. <sup>15</sup>Jamadə Isaa kerunniyama, tayi samma ajapcane cagase isane tia lewayera. <sup>16</sup>Daji Isaye fuwurawadəro: «Kèla awiyen tayi-a kambiwu diwi?» cène tayia kiworo. <sup>17</sup>Curo jamadəyen kam laaye tiro: «Sayinna, tadani niro njukkudəkko. Ti karuwaa, sedandə tiro mana dapcəgəna. <sup>18</sup>Ndaran yaye karuwadə tia cədaiya, tia cidiro bəp gəpce, cinju nga bilwua sherinju nalje suduji. Sedandə dujaro fuwurawanəmba lowoyekkəniya, tayiro katkerō,» yeno. <sup>19</sup>Isaye tayiro: «Am jaman adəyeso kambərsenambuwu, har sawi gairo dawundon dəgakki? Koro sawi gairo nayia rannjakki? Tadadəa wuro sukkudowo!» yeno. <sup>20</sup>Daji tadaradəa tiro kekkudo. Sedandə Isaa kirunniyama, tadaradəa bakce, kar kar loloje cidiro cure cinju nga bilwua fərwəryeno. <sup>21</sup>Isaye bawa tadaradəyedəro: «Tən sawi gai adə tiro wakkajiyi?»

---

<sup>1</sup>9.11 Nawi Iliya burwoje isi - Kawu Almasiwu Alaye isidəro, Nawi Iliya isi.

cène tia kiworo. Kamdaye tiro: «Gananjun. <sup>22</sup>Tia njejoro ngəwuro kannu so, ingi soro gəpcəgəna. Rangəmia, marne njunosane andia sasane!» yeno. <sup>23</sup>Daji Isaye tiro: «A! Rangəmia? Kam duwon mərsajənamadəro awiso yoji!» <sup>24</sup>Sadəman bawa tadaðaye kowo sapce: «Mərsanjəkkəna, marne kambərsenambunin banasəgəne!» yeno. <sup>25</sup>Isa am kada nadəro cagase isairo kirunniya, sedandəro jəkkade: «Nima sedan muwa kəgənjiما, wada njikki, tia kolle luwe, bare gadero tiro ngaammi!» yeno. <sup>26</sup>Daji sedandə burwu cakke tadaðəa tai daje bakce fərdakce kolje kiluwo. Tadaðə alama kamin gairo walje, har am ngəwuye: «Ti bawo, nuna!» yera. <sup>27</sup>Amma Isa tia mukkoyen cədane sapkenniya, tadaðə cije dayeno.

<sup>28</sup>Isa fadore kərgaanniya, fuwurawanjuye runjan tiro: «Awiro sedandəa duda andiro katkero?» cane tia keworo. <sup>29</sup>Isaye tayiro: «Moduwan gənia, jawal sedan jiri adəa duduye bawo,» yeno.

### **Isaye walde kəla karmonju-a cidunju-ayen wuldu**

(Mat 17.22-23; Luk 9.43b-45)

<sup>30</sup>Daji Isa-a fuwurawanju-a nadəa koljane cidi Galileyen koyerə. Isa wunduma nojiya cəraanni, <sup>31</sup>dalilnjudə fuwurawanju alamji nangaro. Tayiro: «Tada Kambədəa mukko ambero sərəccagane tia roro ceyesi. Ngawo tia ceyesənayen kawu yakkua roaro walje ciji,» yeno. <sup>32</sup>Amma fuwurawadə mana adəa asujanni, koro tia kororo riyera.

### **Wundunja kura wo?**

(Mat 18.1-9; Luk 9.46-50)

<sup>33</sup>Daji Isa-a fuwurawanju-a bərni Kafarnaambo kadira. Isa curo fadoyen duwon, tayiro: «Kəla awiyen jawallan kambiwu diwidə?» cène tayia kiworo. <sup>34</sup>Amma tayi cinja kajanni, dalilnjudə jawallan kambiwu kəla wundunja kura woyen cadəna nangaro. <sup>35</sup>Daji Isa napce tayi mewun

yindindəa bowoje tayiro: «Kam laa fuwumaro waldु céraanaa, jama sammaye ngawoma-a wolodinja-aro waljo!»<sup>36</sup> Daji tadaana laaa ngoje dawunjan isadayeyeno. Tadadəa nganjiro ngoyenniya, tayiro: <sup>37</sup>«Wundu duwon tadaana adə gaia cunilan<sup>m</sup> cəmowonamadə, wumaa səmowo. Koro wundu duwon wua səmowonamadə, wua gəni, ti wua sunodənamadəa cəmowo,» yeno.

<sup>38</sup> Yahayaye Isaro: «Sayinna, kam laa sedanso cunəmlan duji kiruiyendeya, andia saanni nangaro, tiro dapkeyeiye!» yeno. <sup>39</sup> Amma Isaye: «Bare tiro dapkəwwi, dalilnjudə wunduma cunilan awo ajabba cədidə rakce diwini wuljiwawo. <sup>40</sup>Awoa kam lawalamande gənidə kaande. <sup>41</sup> Wundu duwon nayi Almasiwuye nangaro ingi kənjaye gəmdowolom fal njadənamadə, jiremaro nayiro wulnjagakki, təmmaro mukowanju fucciawo.

### **Awiso njakke biwu dimiro hangal gənane!**

<sup>42</sup> «Wundu duwon tadawa sanana wua mərsasanaso anije falnjaa cakke talje biwu cədidə, kamdəye daunjuro kau neduram mafəndi lujagane bərəmbo gəpcaanama tiro ngalwo. <sup>43</sup> Mukkonəm njakke talləme biwu dimia, tia kamme! Mukko yindia kannu təmmaro nuiyaworo ngawodəroa, maskin ro sawisoyerо ngaammama niro ngalwo. <sup>44</sup> [Curo jaannamayedən kuri tiyidəa jawuidə sanuiwawo, koro kannudə ye təmmaro nuiyawawo.] <sup>45</sup> Koro sinəm njakke talləme biwu dimia, tia kamme! Si yindia kannuro nia gəptuwudəroa, dungu ro sawisoyerо ngaammama niro ngalwo. <sup>46</sup> [Curo jaannamayedən kuri tiyidəa jawuidə sanuiwawo, koro kannudə ye təmmaro nuiyawawo.] <sup>47</sup> Koro simməm njakke talləme biwu dimia, tia kulaine! Sim yindia kannuro nia gəptuwudəroa, sim falla nodo bargaa Alayero ngaammama niro ngalwo. <sup>48</sup> Curo jaannamayedən

---

<sup>m</sup>**9.37 cunilan** - Isa nangaro.

kuri tiyidəa jawuidə sanuiwawo, koro kannudə ye təmmaro nuiwawo.

<sup>49</sup> «Wunduso kannulan mandaaro walji.<sup>n</sup> <sup>50</sup> Mandadə ngəla, amma kəlambo walyenoa, jiri fin gəle cayenju gairo walji? Adə nangaro nayi kəlando mandaaro wallowo, amando-a ye nanlewan dəgaiwo!»

## KIDA ISAYE CIDI YAHUDIYAYEN

### Kambiwu kəla kamu dəptayen

(Mat 19.1-12)

**10** <sup>1</sup>Daji Isa nadəa kolje cidi Yahudiyaye ngawo bərəm Jordaniyen dəganaro leyeno. Caye gai jama kada tiro captagane, koro walde tayia alamdu badiyeno. <sup>2</sup>Farisawa laa Isaa rijapturo isane tiro: «Kam kamunju dəptadə halal wa?» cane tia keworo. <sup>3</sup>Isaye tayiro: «Awi Nawi Musa nayiro wadaro njado?» yeno. <sup>4</sup>Tiro: «Nawi Musa kakkadu kamu dəptaye ruwunəme tia koldu kwaro amarjəgəna,»<sup>†</sup> yera. <sup>5</sup>Isaye tayiro: «Kəlakibbundo nangaro Nawi Musa wada adəa nayiro ruwungeyera. <sup>6</sup>Amma badiduramnin: “Ala tayia kongwa-a kamu-aro alakkeno.”<sup>†</sup> <sup>7</sup>“Dalil adəyero kwa bawanju-a yanju-aa kolje kamunjuro kərdiye <sup>8</sup>tayi yindiso tiyi fallo waljai.”<sup>†</sup> Adəgaima kua adən fuwun tayidə yindi gəni, tiloro waljana. <sup>9</sup>Adə nangaro awo Ala kəljənadəa bare kam firjənni!» yeno.

<sup>10</sup> Tayi fadon duwon, fuwurawanju kəla mana adəyen tia keworo. <sup>11</sup>Isaye tayiro: «Wundu duwon kamunjua dəpce gade niyajənadə tiro biwu cədde kənjəna cədəna. <sup>12</sup>Koro kamu duwon kwanjua dəpce gade niyajənadə, ti ye kənjəna cədəna,» yeno.

---

<sup>n</sup>**9.49 kannulan mandaaro walji** - Bonedə, tilaman kambərse kambe kibbaji.

<sup>†</sup>**10.4 SK 24.1-4**

<sup>†</sup>**10.6 Bad 1.27; 5.2**

<sup>†</sup>**10.7-8 Bad 2.24**

## **Isaye yalla sananaro barga dəptuwu**

(Mat 19.13-15; Luk 18.15-17)

<sup>13</sup> Am laa Isa yallanja sananaa mukkon lejoro nanjuro cawudi duwon, fuwurawadə amdəa wusayera. <sup>14</sup> Isa adəa kirunniya, karwunju waje fuwurawanjuro: «Yalladəa kollowo naniro isa, bare tayiro dapkəwwi! Nodo bargaa Alayedə am tayi gaiye nuwanja, diye! <sup>15</sup> Jiremaro nayiro wulnjagakki, wundu duwon tadaana gai nodo bargaa Alayedəa kasaccənnidə təmmaro ngayiwawo!» yeno. <sup>16</sup> Daji yalladəa nganjiro ngoje kəlanjaro mukko gənajiye tayiro barga dəpkeyeno.

## **Gariwu laaye ro sawisoye mada**

(Mat 19.16-30; Luk 18.18-30)

<sup>17</sup> Isa cije jawal kidanniya, kam laa cəgase ise fuwunjun tungurumje tiro: «Maləm ngəlama, awi dikke ro sawisoye<sup>o</sup> fandəkki?» cəne tia kiworo. <sup>18</sup> Isaye tiro: «Awiro wua ngəlaman bowosəmi? Ala gənia, wunduma ngəla bawo. <sup>19</sup> Wadawadəa nonəmma:<sup>p</sup> Bare ro kambe tuluwummi, bare kənjəna dimmi, bare nambarwu dimmi, bare sheda kambu dimmi, bare kamba jambanəme kəndanju bummi, bawanəm-a yanəm-aro daraja ye!»<sup>†</sup> yeno. <sup>20</sup> Kamdəye: «Sayinna, tən gananilan wada ani sammaa gakkəna,» yeno. <sup>21</sup> Isa tia ninije kirawo. Tiro: «Awo fal nia maunjəna. Lene kəndanəm sammaa lade talaawaro ye, arsiyi samelan fandəmi. Daji are wua səgai!» yeno. <sup>22</sup> Kamdə mana adəa fangenniya, ti jauro gariwu nangaro fəkkanju kərje karwu kuttuaro sapkadan.

<sup>o</sup>**10.17 ro sawisoye** - Ro duwon na Alayen təmmaro ceriwawo.

<sup>p</sup>**10.19 wadawa** - Wadawa curo Attaura Nawi Musayen ruwuwada.

<sup>†</sup>**10.19 NL 20.12-16; SK 5.16-20**

<sup>23</sup> Isa memeje fuwurawanjuro: «Gariwuye nodo bargaa Alayero ngawonju jauro jau, diye!» yeno. <sup>24</sup> Fuwurawadə mana adəa ajapkera. Amma Isa walde tayiro: «Tadawani, nodo bargaa Alayero ngawodə jauro jau! <sup>25</sup> Gariwuye nodo bargaa Alayero ngawonjudəro karimoye cuwuri riwurayen kodunjuma budu wo!» yeno. <sup>26</sup> Fuwurawadə cayemaa kojənaro ajapcane amanjaro: «Assha! Adəgaia, wundu gèle njèkkawo cuwandi?» yera. <sup>27</sup> Isa tayia ninije: «Kambo yojiwawo, amma Alaro gəni. Alaro awiso yoji!» yeno. <sup>28</sup> Daji Biturusse tiro: «Akko andi awindeso kolliye nia njəgaiyena,» yenniya, <sup>29</sup> Isaye: «Jiremaro nayiro wulnjagakki, wunduma cuni-a kawuri kəji Alayedə-a nangaro fado, bi yeiya, bi kanna, bi bawa, bi ya, bi yalla, bi kulo koljənadə <sup>30</sup>dunia adəman fado, yeiya, kanna, ya, yalla, kulo gadegade mia mia kuttu-ason cuwandiawoma bawo. Koro leira wakkajiyi, ro sawisoye ye cuwandi. <sup>31</sup> Amma am burwoye ngəwu daryeyero waljai, koro daryeye ye burwoyero waljai,» yeno.

### **Isaye kənyakkuyero kəla karmonju-a cidunju-ayen wuldu**

(Mat 20.17-19; Luk 18.31-34)

<sup>32</sup> Isa-a fuwurawanju-a jawal Jerujalembe ngojana duwon, Isa tayin fuwunno ledu cədi. Fuwurawadə ajapcana, koro am tia jagaisodə ye rijana. Koro Isa walde mewun yindindəa səgəriro cuttuluwe awo tiro fuwun wakkajiyidəa tayiro wulduwu badiyeno. <sup>33</sup> Tayiro: «Fanowo, Jerujalembo leniye, Tada Kambedəa mukko wurawa rimannaye-a maləmba Attauraye-aro sərəccagane shara ro tuluwoye tiro cadde mukko kərdiyayero casakke, <sup>34</sup>tayi ye tia rujane tiro lalları təwajagane kirwolan jajarjane roro ceyesi. Koro kawu yakkua roaro walje ciji,» yeno.

## **Lowo Yakuba-a Yahaya-aye**

(Mat 20.20-28)

<sup>35</sup>Daji tadawa Jabadiye Yakuba-a Yahaya-a na Isayero isane tiro: «Sayinna, awo njuworiyemadəa andiro saddəmiya, rayiye!» yera. <sup>36</sup>Isaye tayiro: «Awi nayiro njaddəkkiya, rawuw?» cène tayia kiworo. <sup>37</sup>Tiro: «Marne, kərmainəm darajaa fandəmiya, kolsane nammiyo, fal kəmboramməmlan, fal ye wailanəmlan!» yera. <sup>38</sup>Isaye tayiro: «Awo koruwwadəmaa nonuwvi. Ranguwe kənjaram yakkidən yawi wa? Koro ranguwe kasala dikkidəa diwi wa?»<sup>q</sup> cène tayia kiworənniya, <sup>39</sup>tiro: «Aaa, rangiye!» yera. Isaye tayiro: «Kənjaram yakkidən yawi ye, kasala dikkidəa diwi ye. <sup>40</sup>Amma kəmborammilan so, wailanilan so naptadə, wu gəni kambo amargəkki, na anidə am tayiro dabbargaadaye,» yeno. <sup>41</sup>Fuwurawa mewu gapcanadə adəa fangeranniya, Yakuba-a Yahaya-aro gərgayeyera. <sup>42</sup>Daji Isa tayi sammaa bowoje tayiro: «Nonuwwa, curo jama kərdiyasoyen am duwon jama tayia maiyaro ngojanasodə talaawanja jauro raccaana, koro fuwumanjaso ye amnjaro kənduwo fəlejagai. <sup>43</sup>Amma dawundon ngai gəni. Wundu duwon dawundon kuraro waldu cəraanamadə wolodindoro waljo! <sup>44</sup>Koro wundu duwon fuwumandoro waldu cəraanamadə kərea nayi sammayero waljo! <sup>45</sup>Awoa Tada Kambedəma tiro nanwolodi caddoro gəni kadio, nanwolodi cədo ronju co am ngəwu merujoro kadio,» yeno.

## **Isaye kambu laa cunju Bartimawus isangaduwu**

(Mat 20.29-34; Luk 18.35-43)

<sup>46</sup>Isa-a fuwurawanju-a bəla Jerikoyerō kadira. Jama kada-a rokko Jerikolan keluwunniya, kambu laa cunju Bartimawus tada Timawusse ci jawallen napkada lowo cədi mbeji. <sup>47</sup>Isa kam Najarattedə kojiro fangenniya, kowo saptu badije: «Isa,

---

<sup>q</sup>10.38 kənjaram-a kasala-a - Bone nja.

Tada Mai Daudaye,<sup>r</sup> wua njunosəne!» yeno. <sup>48</sup> Am ngəwu tiro jakkade mədək napco yera, amma cayea kojənaro kowo sapce: «Tada Mai Daudaye, wua njunosəne!» yeno. <sup>49</sup> Daji Isa daje: «Tia bowonowo iso!» yeno. Kambudəa bowojane: «Bare təma kolləmmi! Cine nia bowonji,» yera. <sup>50</sup> Kambudə awonju jaktuye gəpce cije na Isayero kadio. <sup>51</sup> Isaye tiro: «Awı niro njəddəkkiya, raam?» cəne tia kiworo. Kambudəye: «Sayinna, sim fandəkkiya, raakko!» yeno. <sup>52</sup> Daji Isaye tiro: «Lene, kambərsenəm nangaro njəkkawo fandəmma!» yeno. Sadəman sim cuwande jawallan Isaa ga badiyeno.

## KIDA ISAYE JERUJALEMNIN

### Isaye mai gai Jerujalembo ngawo

(Mat 21.1-11; Luk 19.28-40; Yah 12.12-19)

**11** <sup>1</sup>Jerujalemba karənjane gəre bəlawə Baitfaje-a Baitani-aye na Kau Jaitunnedəro kadiranniya, Isa fuwurawanjuye yindi cunode <sup>2</sup>tayiro: «Bəla fuwundoyedəro lenowo! Ngawuwiyyama, koro kutta wunduma tiro ngalte juwanni tuwada nagəwi. Fərangowo kudowo! <sup>3</sup>Kam laaye nayiro: “Awiro adəa diwi?” cənia, tiro: “Kəmadə tilan məradunjua, kərmama kalakci,” wulgənowo!» <sup>4</sup>Daji lejane kuttadə lailan ci fadoyen tuwada nayeyera. Kuttadəa fərakcəi duwon, <sup>5</sup>am laa nadən daadaye tayiro: «Awı diwi? Awiro kuttadəa fəranguwi?» yera. <sup>6</sup>Jiri Isa tayiro wuljəgənadə gairo jaawu cadəne amdə ye tayia kolyera. <sup>7</sup>Daji kuttadəa<sup>s</sup> na Isayero cawude kalwunja kəladəro ferjagane Isa juwane napkeno. <sup>8</sup>Jama kada ye kalwunja kəla jawallen feryera, laa ye ngəlai karaan kamjanadəa səretkera. <sup>9</sup>Am fuwu

<sup>r</sup>10.47 Tada Mai Daudaye - Kaduwu Mai Daudaye, kaala Almasiwu Alaye.

<sup>s</sup>11.7 kuttadəa - Noduwuram Isa mai gairokura bawoa Jerujalembo kəlewan ngayiye.

gərjana so, ngawonnju jaana so kowo sapcane: «Hosanna!<sup>t</sup> Bargaa ti cu Kəmandeyen isimadə! <sup>10</sup>Nodo bawande Mai Daudaye isimadəa bargaajo! Hosanna, Mai Samemaro daraja tio!»<sup>†</sup> cani. <sup>11</sup>Adəgaima Isa Jerujalembo ise Fado Alayero kərgawo. Awiso kirunniya, dunia ləmjəna nangaro, tayi mewun yindində-a rokko caluwe bəla Baitaniyero leyera.

### **Isaye ya tarmuye baskudu**

(Mat 21.18-22)

<sup>12</sup>Wajənanjuwa Isa fuwurawanju-a bəla Baitaniyelan keluwunniya, kəna tia kida. <sup>13</sup>Kuruwun ya tarmuye kalunjua kirunniya, waneye tada cuwandi cəne nadəro kadio. Kadinniya, kalu gənia, awima cuwandənni, dalilnjudə sa tarmuye gəni nangaro. <sup>14</sup>Daji Isaye tarmudəro: «Bare wunduma gadero tadanəm juwunni!» yeno. Koro fuwurawanju adəa fangerā.

### **Isa Fado Alayen**

(Mat 21.12-17; Luk 19.45-48; Yah 2.13-25)

<sup>15</sup>Daji Isa-a fuwurawanju-a Jerujalembo kadira. Isa balballa Fado Alayero ngaye ladomaso-a njuwomaso-aa dudu badiyeno. Tewur wuri canjimasoye-a napturam tattawar ladomasoye-aa təmbalje <sup>16</sup>wundu yayero Fado Alayedəyen karea kodu dapkeyeno. <sup>17</sup>Daji jamadəa alamje tayiro: «Kitawulan ruwuwada: “Fannidəa fado moduwaye jama dunia sammayelan bowojai,”<sup>†</sup> amma nayidə tia jongo gəndewuyero kalakkew!»<sup>†</sup> yeno. <sup>18</sup>Wurawa rimannaye-a maləmba Attauraye-a adəa fangeranniya, jawal Isaa njəjoye madu badiyera. Isaa rijana, dalilnjudə jama samma alamdunjudəa ajapcana nangaro. <sup>19</sup>Dunia ləmgenniya, Isa-a fuwurawanju-a bərnidən keluwo.

<sup>t</sup>**11.9 Hosanna** - Alaa yungoriyo!

<sup>†</sup>**11.9-10** Jaw 118.25-26

<sup>†</sup>**11.17** Ish 56.7

<sup>†</sup>**11.17** Iri 7.11

<sup>20</sup> Wajənanjua suwa ləp jawaldəyen kojai duwon, ya tarmuyedəa har ferdunjuro ngau ngamjəna kero. <sup>21</sup> Daji Biturus takce Isaro: «Sayinna, akko rui! Tarmu baskunəmmadə ngamjəna!» yeno. <sup>22</sup> Isaye tayiro: «Alaa mərsanowo! <sup>23</sup> Jiremaro nayiro wulnjagakki, wundu duwon kau kuruwu adəro: “Cine bərəmbo fidəgəne!” cəne karwunjun shekku baworo awo wuljənadə wakkajiro mərsajiya, wakkaji. <sup>24</sup> Adə nangaro nayiro wulnjagakki, awi yaye moduwalan koruwiya, tia fanduwwaro mərsanowo, kaandoji. <sup>25</sup> Moduwaro danuwwa duwon, kam laa karwun tawwaa, tia gawurnowo! Bawando Mai Samema ye biwundo gawurnnjagai. <sup>26</sup> [Amma tia gawurnnuwwia, Bawando Mai Samema ye biwundo gawurnnjagaiwawo.]»

### Kənduwo Isaye ndaran isi?

(Mat 21.23-27; Luk 20.1-8)

<sup>27</sup> Koro Isa-a fuwurawanju-a waldane Jerujalembo kadira. Isa curo Fado Alayen dadaji duwon, wurawa rimannaye-a maləmba Attauraye-a amwurawa-a nanjuro isane <sup>28</sup> tiro: «Kənduwo filan awo ania dimi? Wundu niro kənduwo awo ania dioyedəa njo?» cane tia keworo. <sup>29</sup> Isaye tayiro: «Wu ye nayiro koro fal njaddəkki, wuro jaawudəa sewo. Siwia, wu ye kənduwo filan awo ania dikkidəa nayiro wulnjagakki. <sup>30</sup> Kasala Yahaya jamaro cəddənadə, sameyen kadio ra kamben? Wuro jaawudəa sewo!» yeno. <sup>31</sup> Daji kattenjan sawardane: «“Sameyen” wulliyea, andiro: “To, awiro gəle tia kasadduwwidə?” cəne sawori. <sup>32</sup> Amma “kamben” wulliye wa?» yera. Adəa wuldunjadə, jamadəa rijana, dalilnjudə am samma Yahayaa nawiro ngojana nangaro. <sup>33</sup> Daji Isaro: «Noniyende,» yera. Isaye tayiro: «Wu ye kənduwo filan awo ania dikkidəa wulnjagakkiwawo,» yeno.

## Misal jérwu agəriduwu kəladowaye

(Mat 21.33-46; Luk 20.9-19)

**12** <sup>1</sup>Daji Isa misalnin wurawa adinwuyesoro manaduwu badiyeno. Tayiro: «Kam laa jérwu inabbe cëde garje curodən bəlaa ingi inabbe tuluwoye laje soro kuruwu juworoye kidando. Daji jérwudəa jérwuwu laaro agərijiye bəlawuroro sapkada. <sup>2</sup>Sa fərdoye kidənniya, nuwanju cuwandoro kareanju laaa na jérwuwdəyero kinodo. <sup>3</sup>Amma jérwuwdə tia cadane bakcane mukko dea duyera. <sup>4</sup>Koro walde karea gade kinodo. Ti yea cadane kəlanju bakcane tia basaryera. <sup>5</sup>Koro walde karea gade kinodənniya, tia roro keyeso. Koro kareawa gade kada kinodo. Laanjaa bakkera, laanjaa keyeso. <sup>6</sup>Kamnju falma tiro gapcuwo, tadanju jauro cəraanadə. Darye tiye: «Tadaniro daraja cadi,» cène tia nanjaro kinodo. <sup>7</sup>Amma jérwuwdə kattenjan: «Adəma warasamadə wo! Arowo tia yejiyo, warasadə kaandero walji!» yera. <sup>8</sup>Daji tia cadane roro ceyese ngawo jérwudəyen gəpkera. <sup>9</sup>To, kəma jérwuyedə awi cədi? Ise jérwuwu ania roro ceje am gadero jérwunjudəa ci. <sup>10</sup>Awo kitawulan ruuwada adəa kəranuwwi wa?

“Kau duwon fado tandomaso wajanamadə,  
tima kau tandoye sammaro faidaaro waljənadə wo.

<sup>11</sup> Adə kəndo Kəmandeye,  
andiro jauro ajabba!”»<sup>†</sup>

<sup>12</sup> Jawal tia taye majai duwon, jamadəa riyera, dalilnjudə kəlanjaman misaldəa kidoro asujana nangaro. Daji tia koljane sapkadara.

---

<sup>†</sup>12.10-11 Jaw 118.22-23

## Kambiwu kəla akki njoyen

(Mat 22.15-22; Luk 20.20-26)

<sup>13</sup>Daji wurawa adinwuyesodə Isaro curo mananjuyen bəlaa lajaa cane Farisawa laa-a am Mai Hirudussa jaana laa-aa nanjuro kenodo. <sup>14</sup>Kadiranniya, tiro: «Sayinna, ni kam jirema ye, wundumaa rinəmbawo yero noniyena, dalilnjudə gayirnəmbawo, jawal Alaye kalkallo yikkərami nangaro. To, Kaisarro<sup>u</sup> akki njodə halal ra haram? Yiye ra bare yiyyende?» cane tia keworo. <sup>15</sup>Amma Isa nanmənafəknjadəaasu je tayiro: «Awiro wua rijamsuwi? Wuro dinariyus<sup>v</sup> sukkudowo rukke!» cəne <sup>16</sup>dinariyus tiro kekkudo. Tayiro: «Cu-a kəla-a wunduye tilan dasaa?» cəne tayia kiworənniya, tiro: «Kaisarre,» yera. <sup>17</sup>Daji Isaye tayiro: «Awo Kaisarredəa Kaisarro yowo, koro awo Alayedəa Alaro yowo!» yeno. Adəgaima tia jauro ajapkera.

## Kambiwu kəla cinowo duniayen

(Mat 22.23-33; Luk 20.27-40)

<sup>18</sup>Sadusiya laa, tayi cinowo duniaye bawo wuljaidə, na Isayero isane tiro koro cadde: <sup>19</sup>«Sayinna, Nawi Musaye: “Kam laa yanjugəna tada bawo bawoje kamu koljia, kamu yanjugəna faccəgənayedəa niyajo yanjugənaro kaduwu majuwo!”<sup>†</sup> ruwujəna. <sup>20</sup>Akko yaana tulur mbeji. Burwoyedə kamu ngoje tada cuwandənnin bawoyeno. <sup>21</sup>Yindiyyedə ye kamudəa niyaje tada cuwandənnin bawoyeno. Yakkuyedə ye ngai. <sup>22</sup>Adəgaima tayi tulurdə tada cawandənnin bawoyerə. Darye kamudə ye bawoyeno. <sup>23</sup>To, tayi tulurso tia camowonadə, cinowo duniayen kamu wundunjayero walji?» cane tia keworo.

<sup>u</sup>12.14 Kaisar - Gomna kura Rombe.

<sup>v</sup>12.15 dinariyus - Wuri tilan akki biyajai.

<sup>†</sup>12.19 SK 25.5

<sup>24</sup> Isaye tayiro: «Dalil nayi fattuwuwwayedə, kitawu bi kənduwo Alaye nonuwwi, mare? <sup>25</sup> Karmolan cijaiya, larusa so, niya so cadiwawo, tayi alama malaiyawa samelan dasaanadə gairo waljai.<sup>w</sup> <sup>26</sup> Koro karmon cidudə, Attaura Nawi Musayen kəranuwwi wa? Kitawulan na kannu dawu kəska cambiyedən Alaye Musaro: “Wuma Ala Ibrahimbe-a Isakuye-a Yakubaye-a wo,”<sup>†</sup> cənna. <sup>27</sup> Ti Ala am nunaye gəni, am roaye, diye! Nayidə tai danuwe fattuwuwwa!» yeno.

### **Wadawa samman finja kura wo?**

(Mat 22.34-40)

<sup>28</sup> Maləmba Attauraye falnja isəna kambiwunjadəa kərənji duwon, Isa tayiro jaawu ngəla cinaro asuyenniya, tiro: «Wadawa samman finja kura wo?» cəne tia kiworo. <sup>29</sup> Isaye tiro: «Sammaro kura wodə, tima: “Jama Israyilawuye fanowo, Ala Kəmandedə ti tilonju lok. <sup>30</sup> Ala Kəmanəmba karwunəm ngan, ronəm ngan, hangalnəm ngan, dunonəm ngan raye!”<sup>†</sup> <sup>31</sup> Koro yindiyedə: “Kəmaskinəm yea kəlanəm gairo raye!”<sup>†</sup> Wadawa aniro kura wo gade bawo!» yeno. <sup>32</sup> Maləm Attaurayedəye tiro: «Jirenəm, sayinna! Awo wulləmmadə fagat: Aladə ti tilonju. Ti gənia, Ala gade bawo. <sup>33</sup> Tia karwunəm ngan, hangalnəm ngan, dunonəm ngan raame kəmaskinəm yea kəlanəm gairo rawodə, layaso-a sadaaso-a sammaro kura wo!» yeno. <sup>34</sup> Isa maləmdə hangal kəjiaro juwapcəgəna kirunniya, tiro: «Ni-a nodo bargaa Alaye-a kattendo kuruwu gəni!» yeno. Ngawo adəyen wunduma cinju mudu kaje tiro koro gade cəddənni.

---

<sup>w</sup>**12.25 malaiyawa gai** - Sawisoro na Alayen roa dasayi, gaderō sanuiyawo. Adəma nangaro samelan kaduwu mada bawo.

<sup>†</sup>**12.26** NL 3.6    <sup>†</sup>**12.29-30** SK 6.4-5    <sup>†</sup>**12.31** Lew 19.18

## **Almasiwudə Tada Mai Daudaye**

(Mat 22.41-46; Luk 20.41-44)

<sup>35</sup>Fado Alayen Isa jamadəa alamdu cədi duwon, tayiro: «Ndayilan maləmba Attaurayedəye Almasiwudə Tada Mai Daudaye<sup>x</sup> canidə? <sup>36</sup>Mai Dauda kəlanjuma Ruhu Alayen manaje: “Kəmandeye Kəmaniro: ‘Namme kəmborammilan duwon, kəladowanəmba cidiya sinəmbero yakkəkko!’ cənna.”<sup>†</sup> <sup>37</sup>Mai Dauda kəlanjuma tia Kəmalan bowojənadə, ndayilan gəle Almasiwudə tadanjuro walji?» yeno. Jama jauro kada karwu kəjiaro tia kərənjai.

## **Hal maləmba Attauraye**

(Mat 23.1-36; Luk 20.45-47)

<sup>38</sup>Curo alamdunjuyen Isaye: «Maləmba Attaurayero hangal gənanowo! Kalwu kuruwua dadadu caraana, koro kasuwulan lewa darajaa-a <sup>39</sup>dandallan bi masəna kuralan na darajaa-a jaumaro caraana. <sup>40</sup>Kamu kwa faccəgənaasoye kəndanja sammaa jawui ye, halnja gəraduro fuwu jamayen moduwa kuruwuro gərjai ye. Am aniyə ajawunja leiran jauro kura!» yeno.

## **Sadaa kamu kwa faccəgənaaye**

(Luk 21.1-4)

<sup>41</sup>Isa karən sanduwu sadaa fidaaramben napkenniya, jamadə curo sanduwudəyero wuri fijagai lawarji duwon, arsiywı kada isane wuri ngəwu fijagai kiro. <sup>42</sup>Koro kamu ngudi kwa faccəgənaa laa ye ise gursu kime<sup>y</sup> yindi fiyeyeno. <sup>43</sup>Daji Isa fuwurawanjua bowoje: «Jiremaro nayıro wulnjagakki, kamu ngudi kwa faccəgənaa adə sadaa

<sup>x</sup>12.35 **Tada Mai Daudaye** - Kaduwu Mai Daudaye, kaala Almasiwu Alaye.

<sup>y</sup>12.42 **gursu kime** - Kunguna yaudiyaye tamannju ganama.

<sup>†</sup>12.36 Jaw 110.1

am gadeye sammaa kojənaro fijəgəna.<sup>44</sup> Tayi samma arsiyinjalan ngojane fiyeyera, amma ti ngudi duwon kəndanju sammaa fiyeyeno. Awo ronju riwɔye ngaa fiyeyeno,» yeno.

### Jawawi Isaye

#### kəla wurdu Fado Alaye-a sidu duniaye-ayen

(Mat 24.1-44; Luk 21.5-38)

**13** <sup>1</sup> Isa Fado Alayen luwo cədi duwon, fuwurawanjuye fal tiro: «Sayinna, akko rui kau ani-a soro ani-a jaumaro ajabba!» yeno. <sup>2</sup> Isaye tiro: «Soro mafəndi mafəndi ania rumma, gəna? Kau ani sammaa wurjane fijai, har tiloma kəla kamanjuyen gapciwaworo walji,» yeno.

### Badiduram boneye

(Mat 24.3-14; Luk 21.7-19)

<sup>3</sup> Isa kəla Kau Jaitunnen na Fado Alaye turuidən napcəna duwon, Biturus-a Yakuba-a Yahaya-a Andarawus-a runjan isane tiro: <sup>4</sup> «Andiro wulsagane, sawi awo ani wakkajai? Koro awo ani sammaye sanja cədiya, awi alama duwon ambo fəlediyidə wo?» cane tia keworo. <sup>5</sup> Isaye tayiro: «Hangal gənanowo, bare wunduma nayia njawatkənni! <sup>6</sup> Am ngəwu cunilan<sup>z</sup> isane: “Wuma ti wo!” cane am kadaa cawatki. <sup>7</sup> Kəriwu na karənso-a kuruwuso-alan nukcənaro fanuwiya, bare hangalndo cijənni! Sai awo ani burwon wakkajaiya duwon, amma sa njerorambe kua yaye cədənni. <sup>8</sup> Lardu-a lardu gade-a lawaladai, koro kərmai-a kərmai gade-a ye kittenjan kəriwu gərjai. Cidi ye na gadegaden loloji, koro kəna ye na naro ngayi. Awo ani samma badiduram boneye bas, alama kamu tia curo lejəna gai.

<sup>9</sup> «Hangal gənanowo! Fuwu majilissero njasade dandalsolan kowonjai, koro wu nangaro fuwu gomna so,

---

<sup>z</sup>13.6 cunilan - Cu Almasiwu Alaye kəlanjaro ngojane tayima ti wo cani.

mai soyen danuwi, tayiro shedaro walloworo.<sup>10</sup> Adəgaima sai kawuri kəji Alayedə jama duniaye sammaro wuldiyiya duwon.<sup>11</sup> Nayia njadane shararo njasadiya, bare kəla awo wulluwyen karwungai diwwi. Awo wulduye Ruhu Alaye sadən nayiro njadidəa mananowo, dalilnjudə nayi gəni, tima manaji nangaro.<sup>12</sup> Yaana yanjugənaa sərəcciyə roro ceysi, bawa ye tadanju ngai, tadawa ye bawanja-a yanja-aro turu cadde casakke tayia roro ceysi.<sup>13</sup> Cuni nangaro<sup>a</sup> am samma nayia wanjai, amma kam mərje har sa njerorambero<sup>b</sup> dəganamadə njəkkawo cuwandi.

### *Bone kura*

(Mat 24.15-28; Luk 21.20-24)

<sup>14</sup> «Sa duwon awo waada jauro batti masiwa kudoma na tia jussənnilan daada ruwiya,<sup>†</sup> (Kəradumadə asujo!), daji am lardu Yahudiyayen dasaanadə cija kauro cagaso leja!<sup>15</sup> Kam kəla soronjuyen dəganadə bare jəpce kare ngoduro curo sorodəyero ngaanni!<sup>16</sup> Koro kam kulolan dəganadə ye bare kalwunju ngoduro waldənni!<sup>17</sup> Yim anin kamu curoa so, nganji cəmbia sodə, kuttunja!<sup>18</sup> Bare awo adə nangərlan<sup>c</sup> wakkajənniro Alaa korowo!<sup>19</sup> Dalilnjudə yim anin bone jauro kuttu mbeji, bone duwon sa Ala dunia alakcənayen tai kuro kudero ngaltema jirinju tuwandənni fuwu yen fagat tuwandiawo nangaro.<sup>20</sup> Koro ca Kəmande bone adəye kawunju fulujənnia, wunduma njəkkawo cuwandiawo. Amma am kərejənadə nangaro kawudəa fulujəna.<sup>21</sup> Sa adən kam laaye nayiro: “Akkonju Almasiwudə!” bi “Towonju ti!” cənia, bare tia yasarawwi!<sup>22</sup> Dalilnjudə almasiwuwa kattuwuyeso-a nawiya kattuwuyeso-a isane alama so, awo

<sup>a</sup>13.13 cuni nangaro - Isaa kasadduwwa nangaro.

<sup>b</sup>13.13 sa njerorambe - Kənde Tada Kambedə.

<sup>c</sup>13.18 nangəri - Curo lardu yaudiyayen sanju jauro samsu ye, kuttu ye.

<sup>†</sup>13.14 Dan 9.27; 11.31; 12.11

ajabba ajabba so cadəne, yoyenoa, har am kərejənadəmaa jambajane cawatki. <sup>23</sup>Nayidə, hangal gənanowo! Kawu wakkajidəro, awo sammaa nayiro wulnjagakkəna.

*Kənde Tada Kambedəye*

(Mat 24.29-31; Luk 21.25-28)

<sup>24</sup>«Amma ngawo bone yim aniyen kəngal cələmbo walji, kumbal ye nurnju ciwawo, <sup>25</sup>sillowuwaso ye samelan casuri, koro kənduwowa sameye ye jauro lolojai. <sup>26</sup>Daji Tada Kambedə jauro kənduwoa-a darajaa-a curo fofouyen isi carui.<sup>†</sup> <sup>27</sup>Adəgaima malaiyawanju cunode talgəmo duniaye dewu samman ci dajiram duniayen tai ci dajiram sameyero yade amnju kərejənadəa capcaı.

*Misal ya tarmuye*

(Mat 24.32-35; Luk 21.29-33)

<sup>28</sup>«Ya tarmuyen misal adəa asunowo! Sa fəktu badije kalu rijiya, nangəri karənjənaro nonuwwa. <sup>29</sup>Ngaima awo ani wakkajai ruwiya, ti cinnalan del karənjənaro<sup>d</sup> nonowo! <sup>30</sup>Jiremaro nayiro wulnjagakki, am jaman adəye sanuiwawo, sai awo ani samma wakkajaiya duwon. <sup>31</sup>Same-a cidi-a baworo waljai, amma manani təmmaro baworo waljiwawo.

*Faadaro dəgaiwo!*

(Mat 24.36-44; Luk 21.34-38)

<sup>32</sup>«Amma yim bi sa duwon awo ani wakkajaidəa wunduma nojənni. Bawadəro kajia, malaiyawa samelan dasaana ye nojanni, Tadadə ye nojənni. <sup>33</sup>Hangal gənanowo, faadaro dəgaiwo, sanju nonuwvi nangaro. <sup>34</sup>Alamanju kam bəlawuro cədi gai. Kənduwo fannjuro kistuwuyedəa wolodijanjuro koljiye wundunja yayero kidanju ce cinna

<sup>d</sup>**13.29 ti cinnalan** - Tada Kambedəye kəndenju del karənjəna.

<sup>†</sup>**13.26** Dan 7.13-14

guredumaro faadaro dēga cēne sapkadano.<sup>35</sup> Adə nangaro faadaro dēgaiwo, dalilnjudə sa kēma fadoye isidəa nonuwvi nangaro, kajiri, bi bune, bi fajar, bi suwa,<sup>36</sup> bare yekkinndo bawo kēnəm diwi nayia nanjaganni!<sup>37</sup> Awo nayiro wulnjagakkənadəa wundusoro wulgækki, faadaro dēgaiwo!» yeno Isaye.

## KARMO-A CIDU-A ISAYE

### Isaa roro njejoro mada

(Mat 26.1-5; Luk 22.1-2; Yah 11.45-57)

**14**<sup>1</sup> Sala Laya Njèkkayirambe-a sala Burodi Yis Bawoaye-aro kawu yindi gapco. Koro wurawa ŋimannaye-a maləmba Attauraye-a jawal Isaa nangalan tame roro njejoye majai. <sup>2</sup>Tayiye: «Sai sala kojiya duwon, bare jama hangalsango casangənni!» yera.

### Kamu laaye Isaa sittəranjuro dabbarduwu

(Mat 26.6-13; Yah 12.1-8)

<sup>3</sup> Isa bəla Baitaniyelan fado Siman dərimayen<sup>e</sup> masəna cədi duwon, kamu laa səndal curonjun kawudi məndemi ye, jauro tamanna ye, cunju nardi ngoje ise səndaldəa dauyen namje kawudidəa kəla Isayero fiyeyeno. <sup>4</sup> Am laa awo adəa kutturo carune kattenjan: «Awiro kawudidəa basarjidə? <sup>5</sup> Ca kawudi adəa dinariyus<sup>f</sup> yer yakku kojənaro calade wuridəa talaawaro cadəna!» cane tiro səriwu gənaduwu badiyera. <sup>6</sup> Amma Isaye tayiro: «Tia kollowo! Awiro tia suwolluwi? Wuro jauro ser səddəna. <sup>7</sup> Talaawasodə sawisoro curondon mbeji, koro sawi yaye, raawwaa, ranguwe tayia banagəwi, amma wudə sawisoro gəni curondon dəgakki. <sup>8</sup> Kamu adə awo rakcənadəa cədo. Kawudi adəa tiyiniro fijiye sittəraniro

<sup>e</sup>14.3 Siman dərima - Ti calan dərima duwon ngajənadə.

<sup>f</sup>14.5 dinariyus - Dinariyus faldə alwası kida kawu falle.

wua dabbarseyeno. <sup>9</sup>Jiremaro nayiro wulnjagakki, ndaran yaye curo dunia ngayen kawuri keji Alayedea wuljai nguson, kamu adea takturo awo søddnadø yea wuljai,» yeno.

### **Yahusa Iskariyot Isaa sørøttuwuma**

(Mat 26.14-16; Luk 22.3-6)

<sup>10</sup>Daji Yahusa Iskariyot mewun yindindøye falnja Isaa mukko wurawa rimannayero sørøttuwuro nanjaro leyeno.

<sup>11</sup>Adea fangeranniya, karwunja kejije tiro wuri cadi cane wadu ngoyera. Yahusade dama Isaa tayiro sørøttuwuye mada badiyeno.

### **Masøna sala Laya Njøkkayirambe**

(Mat 26.17-25; Luk 22.7-13; Yah 13.21-30)

<sup>12</sup>Yim burwoye sala Burodi Yis Bawoayen, yim duwon ngølaro Laya Njøkkayirambedøa<sup>g</sup> duwajaidø kidønniya, fuwurawanjuye tiro: «Ndaran leniye masøna layayedøa niro dabbarnjøgøye bumi?» cane tia keworo. <sup>13</sup>Daji Isa fuwurawanjuye yindi cunode tayiro: «Børnidøro ngawowo, kam laa bule ingia ngojøna-a køla kølluwi. Tia gaiwo, <sup>14</sup>fado duwon ngaanaye kømadøro wulgønowo: “Sayinnaye kusottoram na fuwurawanju-a rokko masøna layayedøa cadidø ndaran?” <sup>15</sup>Nayiro soro sameye ngim kura curon karea dabbargada felenjagai. Nadøn masønadøa andiro dabbarsaganowo!» yeno. <sup>16</sup>Daji fuwurawadø lejane børnidøro ngasaye jiri Isa tayiro wuljøgønadø gai awiso kewando. Adøgaima masøna layayedøa dabbaryera.

<sup>17</sup>Kengal kikkurønniya, Isa mewun yindindø-a rokko kadira. <sup>18</sup>Napcana masøna cadi duwon, Isaye: «Jiremaro nayiro wulnjagakki, kamndo fal wua mukko køladowayero sørønsiyi, rokkomaro masøna diye,» yeno. <sup>19</sup>Karwunja jauro kuttaje fal fallen wundu yaye: «Wuma wa?» cøne tia koro

<sup>g</sup>14.12 ngølaro Laya Njøkkayirambe - Ngølaro duwon bunju wowom karmoyera kadumadø.

badiyeno.<sup>20</sup> Isaye tayiro: «Curo mewun yindindəyen kərga, kam duwon wu-a buwururo mukko yakkiyenadə.<sup>21</sup> Tada Kambedə saptidəma,<sup>h</sup> jiri kəlanjun kitawulan ruwuwendə gai, amma kam duwon Tada Kambedəa kəladowanjuro sərəcciyidə, kuttunju! Kam adə tambənnima tiro ngalwo!» yeno.

### Masəna Kəmaye

(Mat 26.26-30; Luk 22.14-23; 1Kor 11.23-25)

<sup>22</sup> Masəna cadi duwon, Isa burodi ngoje Alaro ardiyenniya, fəsakce tayiro ce: «Ngonowo, adə tiyini,» yeno. <sup>23</sup> Koro kənjaram ngoje Alaro ardiyenniya, tayiro ce tilan tayi samma kesano. <sup>24</sup> Isaye tayiro: «Adəma buni aman ndəptaye<sup>i</sup> duwon am kada nangaro fidənadə wo.<sup>†</sup> <sup>25</sup> Jiremaro nayiro wulnjagakki, na adən fuwun gaderō ingi inabbe<sup>j</sup> yakkiwawo, har yim nodo bargaa Alayen bərinno yakkiro,» yeno. <sup>26</sup> Daji aiya Alaa njungoroye yeyeranniya, caluve Kau Jaitunnero leyera.

### Isaye Biturus tia angərji wuldu

(Mat 26.31-35; Luk 22.31-38; Yah 13.36-38)

<sup>27</sup> Isaye fuwurawanjuro: «Nayi samma ngaworo waldowi, akko awo kitawulan ruwuwendə: “Sənidəa bangəkkiya, dimiyadə tatardai.”<sup>†</sup> <sup>28</sup> Amma karmolan cikkiya, nayia burwonjakke cidi Galileyero lekki,» yeno. <sup>29</sup> Biturusse tiro: «Tayi samma ngaworo waldai yaye, wudə ngaworo waldəkkawawo!» yeno. <sup>30</sup> Isaye: «Jiremaro niro wulnjəgəkki, ku bune adəman kawu gudowom yindiro kokkore cakkidəro, wua yakkuro angərsəmi,» yeno. <sup>31</sup> Amma Biturusse kowo

<sup>h</sup>**14.21** Tada Kambedə sapti - Isa nui.

<sup>i</sup>**14.24 buni aman ndəptaye** - Bu Isaye aman katte Ala-a adamgəna-aye tabbacciyyidə.

<sup>j</sup>**14.25 ingi inabbe** - Diben.

<sup>†</sup>**14.24** NL 24.8; Iri 31.31-34

<sup>†</sup>**14.27** Jak 13.7

dunoaro sapce tiro: «Dole ni-a rokko nuiyero walyeno yaye, təmmaro nia angərnjækkiwawo!» yeno. Tayi samma ye ngai wulyera.

### **Moduwa Isaye**

(*Mat 26.36-46; Luk 22.39-46*)

<sup>32</sup>Na tiro Gessemani canidəro kadiranniya, Isaye fuwurawanjuro: «Na adən nammowo duwon, moduwa dikke,» yeno. <sup>33</sup>Daji Isa Biturus-a Yakuba-a Yahaya-aa ngoje rokko lejane karwunju kuttaje ronju jauro bannadu badiyeno. <sup>34</sup>Tayiro: «Karwuni jauro kuttajəna, har nukki gai. Na adən danowo, faadaro dəgaiwo!» yeno. <sup>35</sup>Gana laa kuruwuje cidiro təmdiye, yojia, sa boneyedə tia cədanniro moduwa dio badiyeno. <sup>36</sup>Tiye: «Bawani, awiso niro yoji. Kənjaram adəa<sup>k</sup> wulan ngone! Adə yaye awo wu raakkəna gəni, awo ni raammadəma!» yeno. <sup>37</sup>Na fuwurawanjuyero walladanniya, kənəm cadi nayeyeno. Biturusso: «Siman, kənəm wa dimi? Assha! Sa fallo rangəme faadaro dəgambawo wa? <sup>38</sup>Bare jaraptuwawiro faadaro dəgaiwo, moduwa dewo! Ruhudə cəraana, amma tiyidə duno kəskea!» yeno.<sup>1</sup> <sup>39</sup>Koro walde leje mana cayedəlan moduwa kido. <sup>40</sup>Nanjarō walladanniya, caye gai kənəm cadi nayeyeno, simnja nga kurwowujəna nangaro. Awo tiro wulduwuyema nojanni. <sup>41</sup>Yakkuyero walladanniya, tayiro: «Kuamison kənəmbo bowadando tussuwi wa? Cerəna! Sadə cədəna, Tada Kambedəa mukko biwumasoyerə sərəccaana. <sup>42</sup>Cinowo, leniyo! Akkonju kam wua sərənsiyimadə del karənjəna!» yeno.

---

<sup>k</sup>**14.36 kənjaram** - Kənjaram bone njaye.

<sup>l</sup>**14.38 ruhudə** - Ro kambe.

### **Isaa ta**

(*Mat 26.47-56; Luk 22.47-53; Yah 18.1-11*)

<sup>43</sup> Sadəman Isa mana cədi ngai duwon, Yahusa mewun yindindəye falmja kadio. Jama kada ye na wurawa ɻimannaye-a maləmba Attauraye-a amwurawa jamaye-ayen kashagar so, ka so mukkonna ti-a rokko kadira. <sup>44</sup> Caman ti sərəttuwumanjudə tayiro bəlaanan isanojiye: «Kam tiro lewa darajaye yiddəkkidə, tima! Tia taiwo, fərəstiaworo yadowo!» cənna. <sup>45</sup> Daji Yahusa kadinniyama, na Isayero ise: «Sayinna!» cəne tiro lewa darajaye kiddo. <sup>46</sup> Daji Isaa mukkon dap keda. <sup>47</sup> Am nanjun dajanadəye falmja kashagar ficce wolodi ɻiman kuraya bakce səmonju tən kamgeno. <sup>48</sup> Isaye tayiro: «A! Nayi kashagar so, ka so mukkonna wua gəndema gai taro wa isuwidə? <sup>49</sup> Yim nguson nandon Fado Alayen dəgaiye jamaa alamməkki duwon, wua sədawwi. Amma awo kitawulan ruwuwendə wakkajo!» yeno. <sup>50</sup> Daji fuwurawanju samma tia koljane keyaso.

<sup>51</sup> Jairo laa mayafi gənia, awima tiyinjun bawo Isaa jəgana mbeji. Amdə tia kedanniya, <sup>52</sup> mayafidəa koljiye de sulkiyaso.

### **Isa fuwu majilis kura adinwuyen**

(*Mat 26.57-68; Luk 22.66-71; Yah 18.12-24*)

<sup>53</sup> Daji Isaa ngojane na ɻiman kurayero kesado. Nadən wurawa ɻimannaye-a amwurawa jamaye-a maləmba Attauraye-a samma ye capkadara. <sup>54</sup> Biturus ye katte kaskadaaro har balballa fado ɻiman kurayedəro tia jəgane kərgaanniya, kannu gəttoro dawu gureduwu Fado Alayen napkeno.

<sup>55</sup> Wurawa ɻimannaye-a majiliswu samma-a shedə Isaa roro njejoro mayera yaye, cawandənni. <sup>56</sup> Am kada kəlanjun shedə bowuye cadəna, amma cinja tilojənni. <sup>57</sup> Daji am laa cijane shedə bowuye cade: <sup>58</sup> «Tiye: “Wudə Fado Alaye mukko

kamben tədandəna adəa wurnəkke curo kawu yakkuyen mukko kamben gəni gade tandəkki,” ngai cəne fangeiye,» yera.<sup>59</sup> Amma kəla adəyeman cinja tilojənni.

<sup>60</sup>Daji ɻiman kuradə cije dawunjan daje Isaro: «Jaawunəm bawo wa? Awi gəle am ani kəlanəmnin shedajaidə?» cəne tia kiworo. <sup>61</sup>Amma Isa cinju kaje jaawu cinni. Koro ɻiman kuradə walde tiro: «Nima wa Almasiwu Tada Ti Bargaayedə wo?» cəne tia kiworo. <sup>62</sup>Isaye: «Wuma! Koro Tada Kambedə mukko kəmboram Mai Kənduwomayen napkada ye, curo fofou sameyen kənde cədi ye ruwi,»<sup>†</sup> yeno. <sup>63</sup>Daji ɻiman kuradə kalwunju karje:<sup>m</sup> «A! Sheda jiri fi gəle gade maniye? <sup>64</sup>Alaa gaskadunjudəa fanuwwa. Awi gəle təmanuw?» cəne tayia kiworənniya, tayi samma tiro shara kamjagane ronju tuluwoma jusso yera. <sup>65</sup>Daji laanja tiro lallari təwatəwajagane simnju jakcane tia babaktu badiyera. Tiro: «Nawinawi de!» cani. Adəgaima gureduwudə ye tia cadane mařin babakkerā.

## Biturusse Isaa angərdū

(Mat 26.69-75; Luk 22.54-65; Yah 18.25-27)

<sup>66</sup> Biturus balballa fadoyedən cidiyan duwon, kir ɻiman kuraye laa nadəro kadio. <sup>67</sup> Biturus kannu jəgətti kirunniya, tia ngəlaro ninije: «Ni ye Isa kam Najaratte-a rokko kərgaw!» yeno. <sup>68</sup> Amma Biturus angərje: «Awo wulləmidəmaa nokkəni, asukkəni!» yeno. Daji cinna ngaworambo culuwe gudowom kokkore kekko. <sup>69</sup> Kirdə walde tia cure am nadən dasaanadəro: «Kam adə ye falnja!» yeno. <sup>70</sup> Koro Biturus walde angəryeno. Gana sam kidənniya, am nadən dasaanadəye Biturusso: «Fagatto ni ye kamnja fal, ni kam lardu Galileye nangaro!» yera. <sup>71</sup> Amma Biturus kəlanju baskuje kansi juwe: «Kam kəlanjun mananuwi

---

<sup>m</sup>14.63 kalwunju karje - Karwukuttanjuro kalwu daunjuyedəmaa karyeno.

<sup>†</sup>14.62 Jaw 110.1; Dan 7.13-14

adəa nokkəni!» yeno. <sup>72</sup>Sadəman gudowom yindiyero kokkore kekko. Daji Biturus awo Isa tiro wuljəgənadəa takkeno. Isaye: «Kawu gudowom yindiro kokkore cakkidəro, wua yakkuro angərsəmi,» cənna. Takkenniya, tai daje so ngoyeno.

### **Isa fuwu Gomna Bilatussen**

(Mat 27.11-14; Luk 23.1-5; Yah 18.28-38)

**15** <sup>1</sup>Dunia wayenniyama, wurawa rımannaye-a amwurawa jamaye-a maləmba Attauraye-a majilisu samma-a ci tiloaro sawari kedo. Daji Isaa cekkere caade mukko Gomna Bilatussero kesakko. <sup>2</sup>Bilatusse Isaro: «Nima wa Mai Yaudiyayedə wo?» cəne tia kiworo. Isaye: «Nima wulləm, wuma!» yeno. <sup>3</sup>Wurawa rımannayedə awo kadan Isaa burwuyera. <sup>4</sup>Daji Bilatus walde tiro: «Kalakkəmbawo wa? Awo kadan burwunjanadəa fanəmmi wa?» cəne tia kiworo. <sup>5</sup>Amma Isa kua yaye tiro kalakcəgənni, har Bilatus ajapkeno.

### **Isaro shara karmoye kamduwu**

(Mat 27.15-26; Luk 23.13-25; Yah 18.39-19.16a)

<sup>6</sup>Caman kərwu nguson sala adəlan gomnadə kosoma fal jama caworənadəa tayiro salamjiyi. <sup>7</sup>Sa adən kam laa amanju-a turu cade kam ceyese kosolan rojana mbeji, cunju Barabbas. <sup>8</sup>Daji jama na gomnayedəro isane awo caman tayiro caddidəa njəddoro tia koro badiyera. <sup>9</sup>Bilatusse tayiro: «Mai Yaudiyayedəa wa nayiro salamnjagakkiya, rawuw?» cəne tayia kiworo. <sup>10</sup>Awoa nandərinja nangaro wurawa rımannayedə Isaa mukkonjuro sərətkeyeraro nojəna. <sup>11</sup>Amma wurawa rımannayedə jamadəa casakke cuju Isayero Barabbassa tayiro salamjuwo yera. <sup>12</sup>Bilatusse walde tayiro: «Awi gəle kam tia Mai Yaudiyayelan bowonuwadəro yiddəkki?» cəne tayia kiworo. <sup>13</sup>Kowo sapcane: «Kəskaro tia jagəne no!» yera. <sup>14</sup>Bilatusse: «Awiro? Ayau awiye cədo?»

yenniya, caye baworo kowo sapcane: «Këskaro tia jagène no!» yera.<sup>15</sup> Daji Bilatus awo ronjaye cëdiya cëraana nangaro, tayiro Barabbassa salamgeyeno. Amma cakke Isaa kirwolan jajaryeranniya, tia këskaro jajaaro mukkonjaro kekko.

## **Sojiyaye Isaa basardu**

(Mat 27.27-31)

<sup>16</sup> Daji sojiyadə Isaa curo balballa gomnariyero caade kewunja sojiyaye sammaa bowojane capkera. <sup>17</sup> Kalwu kime<sup>n</sup> tiro lujagane ariawu kariyiye<sup>o</sup> kèlejane këlanjuro gënayeyera. <sup>18</sup> Daji tiro: «Ala ngewuro, Mai Yaudiyaye!» wulduwu badiyera. <sup>19</sup> Kalan këlanju babakcane lalları tiro tewajagane fuwunjun tungurumjane tiro daraja keto. <sup>20</sup> Tiro rudu gënajagane kerənniya, kalwu kimedəa የinjane kajəmunju cayedəa lujagane tia këskaro jaduwuro kesado.

## **Isaa këskaro jaduwu**

(Mat 27.32-44; Luk 23.26-43; Yah 19.16b-27)

<sup>21</sup> Kam laa bëla Kuranye mbeji, cunju Siman, tidə Aleksanda-a Rufus-aye bawanja. Karaan cijëna kodu cëdi duwon, sojiyadə dunodunon tia casakke këska Isayedəa ngoje leyera. <sup>22</sup> Isaa na tiro Golgota canidəro kesado, Golgotaye maananjudə Na Buwo Kəlaye. <sup>23</sup> Isaro diben curonjun awo laa mir cani<sup>p</sup> diyadaa caro keto, amma kənjaro wayeno. <sup>24</sup> Daji tia këskaro jajagane kajəmunju ngojane wundunja yaye nuwanju cuwandoro walawala cade kattenjan dagaryera. <sup>25</sup> Sa Isaa jajaanadə, sa lëgar suwaye. <sup>26</sup> Allo ayaunju kəlan ruwuwadadə: MAI YAUDIYAYE. <sup>27</sup> Gəndewu yindi yea ti-a rokko jayeyera, faldə kəmboramnjulan, faldə ye wailanjulan. <sup>28</sup> [Adəgaima awo kitawulan ruwuwadadə wakkayeno. Tiye:

<sup>n</sup>15.17 **kalwu kime** - Kalwu maila.

<sup>o</sup>15.17 **ariawu kariyiye** - Jawa kermayıye.

<sup>p</sup>15.23 **awo laa mir cani** - Karwun tiyi jau nəmdaye.

«Amso tia biwumaro ngoyer,»<sup>†</sup> cenna.] <sup>29</sup> Am kamjana kojaisodə tiro rudu gənajagane kəlanja kalakalakcane tiro: «Ap! Ni Fado Alayea wurnəme curo kawu yakkuyen tandəmidə, <sup>30</sup> nda kəskadən jəmme kəlanəm moye!» cani. <sup>31</sup> Wurawa rimannaye ye maləmba Attauraye-a rokko adəgai tiro rudu gənajagane amanjaro: «Am gadea cəkkaana, amma rakce kəlanju cəmoyiwawo! <sup>32</sup> Almasiwu Mai Israyilawuyedə kəskadən kərma jəpco, ruiyo tia kasaddiyo!» cani. Gəndewu yindi ti-a rokko jajaanadə ye Isaa rarayera.

### Karmo Isaye

(Mat 27.45-56; Luk 23.44-49; Yah 19.28-37)

<sup>33</sup> Kausu kəla dawu duwon, dunia nga təmjə cələmbo walje, har sa yakku kajiriyero kiado. <sup>34</sup> Sa yakku kajiriyedə Isa kowo dunoaro sapce: «Eloi, Eloi, lama sabaktani?» yeno, maananjudə «Alani, Alani, awiro wua kolsem?» <sup>35</sup> Am nadən dajanadə adəa fangeranniya, laanjaye: «Fanowo, Nawi Iliyaa bowoji!» yera. <sup>36</sup> Daji falnja cəgase leje soso ngoje diben comcombo ləpciyə cuttuluwe karo lassiye Isaro sayeyeno. Tiye: «Nda kollowo, Nawi Iliya ise tia kəskadən cəsayia, ruiyo!» yeno. <sup>37</sup> Daji Isa kowo dunoaro sapce ro kirəmbo.

<sup>38</sup> Sa adən juwa curo Fado Alayen dəganadə<sup>q</sup> samen tamiya kəla cidiyannaro kudero farak yindiro kargadan. <sup>39</sup> Kajalla sojiyyaye fuwu Isayen daadadə jiri Isa bawojənadəa kirunniya, tiye: «Jiremaro kam adə Tada Alayedəma!» yeno.

<sup>40</sup> Kamuwa laa ye kuruwunin awo ania lawarjai mbeji. Curonjan Meram Magdala-a Meram Yakuba Gana-a Josi-aye yanja-a Salomi-a. <sup>41</sup> Sa Isa cidi Galileyedən tia jaane banajagai. Koro kamuwa gade kada Isaa jaane Jerujalembo isana ye nadən mbeji.

<sup>q</sup>15.38 juwa curo Fado Alayen dəganadə - Juwa adə na Ala-a tadoye gəraji. Maana kardunjuyedə barga karmo Almasiwuyen jawal Ala-a tadoye kaada.

<sup>†</sup>15.28 Ish 53.12

## Sittēra Isaye

(Mat 27.57-61; Luk 23.50-56; Yah 19.38-42)

<sup>42</sup> Yim adə yim dabbarduye.<sup>r</sup> Wajiya yim tustuye nangaro, dunia kajiriyenniya, <sup>43</sup> Isuwu kam Arimatiyaye, ti curo majiliswudəyen jauro kam kura ye, nodo bargaa Alayedəye kəndenju gureji ye, na Gomna Bilatussero ridu bawoaro leje kamin Isayedəa tiro cadoro kiworo. <sup>44</sup> Bilatus Isa nagatto bawojənadəa ajapce kajalla sojiyayedəa bowoje Isa tussəna wa bawojənadəro kiworo. <sup>45</sup> Kajalladəyen Isa bawojənaro asuyenniya, kaminnjudəa Isuwuro kaino. <sup>46</sup> Daji Isuwu leje lowowon batta linne ciwe kamindəa kəskadəlan cəsaye battadən kəkərje kauri curo kauyen lajana laaro cakke sənaje ci kauridəyero kau kura təmbalyeyeno. <sup>47</sup> Meram Magdala-a Meram Josiye yanju-a ye lawarjane na Isaa sənajanadəa kero.

## Karmolan cidu Isaye

(Mat 28.1-10; Luk 24.1-12; Yah 20.1-10)

**16** <sup>1</sup> Yim tustuye koyenniya, Meram Magdala-a Meram ya Yakubaye-a Salomi-a lejane kawudi kamin Isayedəro fidaaro kesiwo. <sup>2</sup> Mawuye yim burwoya<sup>s</sup> suwa ləp kəngal kiluwunniya, kauridəro leyera. <sup>3</sup> Kattenjan: «Wundu gəle ci kauridəyen kau kuradəa andiro təmbalji?» cani. <sup>4</sup> Amma kəla sapkeranniya, akko kau mafəndidə təmballada kero. <sup>5</sup> Kauridəro kasargaanniya, jairo laa kalwu bulla kəmboramnin napkada kero. Tia kerunniya, karwunja tai daje kamgadano. <sup>6</sup> Jairodəye tayiro: «Bare karwundo kamdənni! Isa kam Najaratte ti kam kəskaro jajaanadəa manuwi. Ti na adən bawo, cijəna! Akko na tia sənajanadəa ruiwo! <sup>7</sup> Amma lenowo fuwurawanju-a Biturus-aro: “Ti nayia burwonjane cidi Galileyero leji. Nayiro wulnjaanadə gai, nadən tia ruwi,” wulgənowo,» yeno. <sup>8</sup> Daji karwunja

<sup>r</sup>15.42 yim dabbarduye - Jəmma, yim tustuye səbdu.

<sup>s</sup>16.2 mawuye yim burwoya - Ladu.

kamdəna kar kar lolojaiaro kauridən caluwe cagase leyera.  
Jauro rijana nangaro, wundumaro awima wuljaganni.

### **Isaye fəleduwunju-a samero ledunju-a**

(Mat 28.16-20; Luk 24.36-53; Yah 20.11-23)

<sup>9</sup> [Mawuye yim burwoyea suwa ləp karmolan ciyenniya, Isa burwon Meram Magdala kamu tilan sedan tulur dujənadəro fəleyaada. <sup>10</sup> Meram ye leje am calan Isa-a rokko dasaanadə karwukuttaro cesiridəa najiye tayiro wulyeyeno. <sup>11</sup> Amma Isa roaro waljəna ye, Meram tia curuna yero fangeranniya, njasarairo wayera.

<sup>12</sup> Ngawo adəyen jiri gaden Isa amnja yindi karaaro ledu cadidəro fəleyaada. <sup>13</sup> Tayi yindidə ye waldane amnja gapcanadəro wulyeyera, amma tayi yea njasarairo wayera.

<sup>14</sup> Koro fuwurawanju mewun tilondə masəna cadi duwon, Isa tayi yero fəlediye kəla njasarainambunja-a kəlakibbunja-ayelan tayiro kikkado, dalilnjudə am ngawo cijənayen tia carunadəa njasarairo wayera. <sup>15</sup> Daji Isaye tayiro: «Dunia ngaro lenowo, kawuri kəji Alayedəa adamgəna sammaro wulgənowo! <sup>16</sup> Kam kasacce tiro kasala caddənamadə njəkkawo cuwandi, amma kam kasatturo wajənạmadə wowom Alaye tia cədai. <sup>17</sup> Am kasaccanamadə akko alama rakcane cadidə: Cunilan sedanna dujai, təlamba gade bərin manajai, <sup>18</sup> kadi mukkon ngojai. Sum casaia, tayia loruijewo. Mukkonja am dondiro gənajagaiya, nanlewa cawandi,» yeno.

<sup>19</sup> Kəma Isa mana adəa tayiro cəddənaye ngawon, tia samero casade kəmboram Alayen napkeno. <sup>20</sup> Tayi ye lejane ndara yayero kawuri kəji Alayedəa wuljagai adəgai duwon, Kəmadə tayia banajiye alama kadan manadəa jirero tabbacciysi kərga.]